


BAEBELE, MOKAPO YA NSAMBO ¹

 . . . mpokwa, mpe koyoka Joyce koyemba. Boyebaki ete ezali ekamwiseli na yango moko? Mwana mwasi wana, ndenge nini akoki kokanisa nyonso wana? Mpe mpokwa nyonso azali na loyembo moko ya sika mpo na biso. Ndenge nini akoki kokanisa nyonso wana, azali mpenza mwana ya mayele mingi. Nkolo ápambola mwana yango.

² Sikawa, lobi, na ngonga ya mibale na ndambo, na ndako ya matánga na Charlestown, Indiana. Ndeko na biso ya mwasi oyo akei, molingami, Ndeko mwasi Colvin, tokopesa ye mbote ya nsuka, na—na ndako ya matánga mpe na nkunda, lobi nsima ya nzanga. Na ntango moko boye azalaki na bomoi lokola bino na mpokwa oyo, kasi aleki na ngámbo ya ezipelo, epai oyo bino bokoleka mokolo moko. Mpe moto nyonso oyo akolinga kozala na molúlú yango, akoki koya. Ekozala mpenza lisungi monene mpo na libota Colvin, koyeba ete tabernacle oyo, epai bango nyonso basambelaka mpo na ntango molai mpenza, mpe bongo na bongo, bako . . . Tokosepela ete bókoka koya. Mpe nakanisi . . . molingami na biso Ndeko Mckinney, oyo ateyaki na matánga ya ndeko na ngai ya mobali, eleki mibu ebele, akozua eteni monene ya matánga, mpe basengi ngai naya kosunga ye na—na milulu ya matanga yango.

³ Sikawa, nayezi nsima na ntango mwa moke, na mpokwa oyo. Nazali na makambo mingi ya kosala na mbala moko, nayezi te soki nalanda nzela nini. Bato ebele bazali kobenga, mpo na makama ya motuka mpe makama, mpe bato kobengáká, koyáká. Na lolenge ete, nauti kolongwa na Louisville, kala mingi te, mpo na kozonga awa noki-noki, mpe natiki mbela ebele ya mpasi mpenza, oyo esengeli kosalema, nabanzi, ata na mpokwa oyo. Mpe sikawa bóbondela mpo na biso, wana tozali kokóba.

⁴ Mpe na ntongo ya lelo na—nakómáki na komá na—na ngai ata moke te, na mokapo ya 7 ya Buku ya—ya—ya Baebele. Mpe wana tozali kofungola yango, na mpokwa oyo, nalingi kopesa liyebisi mpo na mayangani ya Ndeko Graham Snelling, na hema oyo ezali na likoló awa, na nsuka ya Avenue Brigham. Soki Nkolo alingi, nalingi kozonga mokolo ya misato na mpokwa. Mpe kuna, tokobongisa mpokwa moko boye, oyo tokokende kuna lokola batíndami, na ntango moko na mpóso oyo, mpo na kotala Ndeko Graham na liyangani yango. Mpe azali . . . alobi: “Nazali na bato malamau mingi.” Mpe—mpe akosepela ete tóya, mpo na lisungi yango. Ndeko Graham Snelling, moto nyonso kati na bino, oyo akendeke na mayangani yango, to oyo alingi kokende, ezali kaka na nsuka ya Avenue Brigham na likoló awa. Moto nyonso akoki koyebisa yo esika yango ezali. Kaka na nsuka ya mabándá ya masano, hema yango ezali wana. Asepelaka na boyokani na

bino. Mpamba te, biso, lokola tabernacle, toyokanaka na ye na mobimba, mokama likoló na mokama, na bongo tozomeka kosunga.

⁵ Sikawa, boye, kala mingi te, tokokóma na esika ya, soki Nkolo alingi, na mokapo ya 11 ya Baebele, nsima na mwa bampokwa, soki Nzambe alingi, mpe kuna, nakanisi ete tokolekisa ntango moko ya nkembo mpe.

⁶ Oh, Nkolo apambolaki biso na ntongo ya lelo na lolenge moko ya malamú mingi, ndenge Asopaki mpenza Molimo na Ye likoló na biso! Mpe sikawa, na mpokwa oyo, tozozela Ye ásala yango lisusu; na nsima, mokolo ya Misato na mpokwa, mpe bongo na bongo. Mpe—mpe na bampokwa oyo nakozala te, Ndeko Neville akozala awa mpo na kokóba longwa na esika oyo ngai nakosukela, soki nazali awa te.

⁷ Nayebaka ata moke te oyo nakosala, okoki kozala awa na ngonga oyo, mpe na ngonga mosusu obengami na California. Bomoni, okoyeba te epai Nkolo akotinda yo. Yango wana ezalaka mpasi mpo ná bongisa banzela ya mibembo mpe náloba ete toko—tokosala *boye-na-boye*. Nakoki kobanda kosala likambo moko boye, Nkolo akotinda ngai na esika mosusu. Bomoni? Boye toyebaka te nini oyo Ye akosala. Kasi: “Soki Nkolo alingi,” tolobaka yango. Mpe nakanisi ete tozali na etinda, to tozui motindo, na Biblia, ete: “Soki Nkolo alingi, tokosala makambo *boye-na-boye*.” Boye soki esalimi ete tokoki koya na bokutani te oyo biso. . . to kokokisa bilaka ya kokutana, tomiyokaka ete ntango mosusu Nkolo alingaki te yango ésalema.

⁸ Mokolo mosusu, tokangamaki, Ndeko Roberson, Ndeko Wood mpe ngai moko. Mpe tomitunaki: “Mpo na nini?” Tofandaki wana, tozalaki kotala kalati, tozalaki koya, mpe tolekanaki lisusu na nordi kino na ba-kilometre ntuku mwambe, na nzela. Mpe nabandá kosala mibembo na banzela minene uta ntango nazalaki na mibu pene na zomi na minei. Mpe namitunaka ndenge nini mpenza nasalá bongo. Tozalaki wana, biso nyonso misato. Bisó nyonso tosalaka mibembo na nzela minene. Tozalaki kotala kalati, tokobaki na nzela 130, kokatisáká Illinois, mpe tobalukaki mwa moke, toyebaki te ete moi ekómaki nsima na biso, na esika ete ézala liboso na biso. Tokómaki komata na nordi na esika ya kokita na sudi. Mpe na mbala moko, tokatisaki nzela, nalobaki: “Oyo ezali nzela oyo esengeli te.” Totalaki yango, sukasuka tomonaki ete tokómaki na ba-kilometre ntuku mwambe mosika na nzela. Tokendeiki mpenza nsima. . .? . . .

⁹ Bongo ntango tozongaki, to—tozalaki kosolola. Nalobaki: “Boyebi mpo na nini? Bisó. . . Ntango mosusu Nkolo alekisi biso na nzela oyo, mpo tósala likama moko ya nsomo te, awa na esika moko boye, oyo ekokaki kosala likambo mosusu. Toyebi ete makambo nyonso etambolaka elongo mpo na bolamu ya

baoyo balingi Nkolo. Yango nde nyonso oyo tosengeli kobatela na makanisi.”

¹⁰ Sikawa, na mpokwa oyo, tozobanda sikawa mwa liteya ya malakisi. Mpe soki nazali. . . Nandimi te ete tokokóma wana, ntango mosusu tokokóma wana na mpokwa oyo, na. . . Oyo ezali mokapo monene ya malakisi likoló na moko na zomi, mpo na lingomba. Mpe ezali likambo monene, oyo tokoki koumela na yango bampóso ná bampóso, na likambo kaka moko wana, ndenge Abraham afutaki moko na zomi na Melekisedeke, mpe soki ezali likambo oyo esengeli mpenza.

¹¹ Epupela oyo ezali kotungisa moto moko kuna na nsima? Bolingi bákanga yango? Soki ezali kotungisa moto moko, kopepa na elongi na bango, moko na bipupela oyo. Soki ezali bongo, bótombola kaka maboko. Mpe, to tindá kaka moko na basungi, tinda moto moko awa epai ya ndeko oyo awa, akokanga yango mpo na yo. Mpe nazali kotika yango épepa likoló na ngai te; soki nayoki molungé mpe nabandi kotoka, bongo okoma, na mbala moko, mo—mongongo ebebi ngai. Boye, ezali likoló na bino, boye, ékotungisa ngai ata moke te. Tolingi ete bino bófanda malamú sikawa.

Tokosala makasi mpo tózua ntango na bino mingi te, kasi tokokota semba kati na Liloba. Mpe yambo ete tósala yango, tósolola na Mokomi na Yango mwa moke.

¹² Sikawa, Tata na Likoló, toyebi oyo ezali na ebombelo te. Kasi eloko bobele moko oyo toyebi mpenza, mpe oyo tondimisami na yango, ezali ete makambo ya malamú ezali liboso na biso. Mpamba te ekomami ete: “Liso emoná yango te, litói eyoká yango te, ekotá mpe na mitema ya bato te, makambo oyo Nzambe abombeli baoyo balingaka Ye.”

¹³ Mpe tobondeli ete Yo ófungola maninísa ya Lola na mpokwa oyo, na ebombelo na Yo, mpe ópesa biso Liloba na Yo, ekozala eloko moko ya malamú, eloko moko oyo ekobakisa kondima na biso lokola Baklisto, mpe kofandisa biso ma—malamú na Nsango-malamú, koleka oyo biso tozalaki ntango tokótaki awa. Sala yango, Tata. Tika ete Molimo Mosanto ázua Liloba na Nzambe mpe ákabola Yango na motema moko na moko, kokokana na bosenga na biso. Tobondeli na Nkombo na Yesu, Mwana na Yo molingami. Amen.

¹⁴ Sikawa, na ntongo ya lelo, liboso tóbima, tokómaki na molongo ya nsuka ya mokapo ya 6, boye tokoki kokende mbala moko na oyo ya 7.

*To mobongisi ya koya na ye mpo na biso akotaki,
Yesu, akomisami nganganzambe monene mpo na libela,
kolanda molongo ya Melikisedeke.*

¹⁵ Sikawa tokotanga milongo misato ya liboso, to milongo mibale ya liboso, to milongo misato ya liboso, kútu, ya mokapo ya 7, mpo tókoka kobanda na mbala moko.

Mpo ete Melikisedeke, mokonzi na Saleme, nganga na Nzambe oyo-aleki-likolo, azuanaki na Abalayama wana ebutwaki ye longwa na koboma mikonzi mpe apambolaki ye;

Abalayama akabelaki ye ndambo na zomi na biloko nyonso, (wana nde moko na zomi na bino); liboso ye azalaki Mokonzi na boyengebene, yango ntina na nkombo na ye. . . na nsima azalaki Mokonzi na Saleme, yango ete Mokonzi na kimia;

Ye mpe tata te na mama te na etangeli na mabota te, . . . na ebandeli te. . . na ebandeli na mikolo te to na nsuka te; kasi asili kokokana na Mwana na Nzambe; akoumelaka nganga libela.

16 Oyo maloba kitoko mpenza! Sikawa ekosengela na biso kozonga na Kondimana ya Kala, kokundola makambo ya motuya yango. Mpe, oh, ndenge nalingaka yango!

17 Boyebi, na Arizona, tozaláka koluka biloko ya motuya na mabelé. Mpe tozalaki kokende na mabelé ya kitoko, M. Mc Anally mpe ngai moko. Mpe tozalaki komona esika oyo ezalaki lokola, na kati ya mwa mabúlu, epai mwa mai ezalaki kotiola, tóloba “esika esukwami.” Mpe nazalaki. . . Azalaki kosala ete nágumbama mpe nánika zélo mpe “fuu,” kofúla yango. Na nsima, konika mpe “fuu,” kofúla yango. Mpe nazalaki komituna mpo na nini azalaki kosala bongo. Sukasuka namonaki, bomoni, ntango ozali kofúla zélo, ezalaka pepele. Mpe nyonso, ata mondolu, ezalaka pepele koleka wolo. Wólo ezali na bozito koleka mondolu. Na bongo ntango ozali kofúla, bibende mosusu nyonso, ná zelo mpe bosoto epumbwaka, kasi wolo ekotikala na mabelé. Yango wana, soki omoni mwa kosukwama moko esalemi *awa*, etalisaka ete molongo moko ya wolo ezali na esika moko boye kuna likoló. Mbula esili kosukola mwa biteni ya mike mike oyo. Na bongo tozui bapikási ná biloko mosusu, mpe totimoli ngomba mobimba, tóloba, koluka wolo yango. Kotobola mabulu na mabelé, kotimola yango. Kotia dynamíte, kopanza mabelé yango. Kokóba kotimola mabulu, kokita kino tokomona, komona makéle monene yango. Sikawa, yango nde tobengaka “kolukaluka makéle kati na mabelé.”

18 Mpe na mpokwa oyo tokomeka kozua Liloba na Nzambe, mpe kosalela Yango na nguya ya Molimo Mosanto, mpo na kopanza bozangi litomba mpe ntembe nyonso kati na biso, mwa biloko nyonso ya pepele wana, oyo ezangi mobóko, oyo ezangi bozító na bomoi na biso, tolingi kopanza yango nyonso mpo tokoka komona makéle ya nkembo oyo. Makéle yango ezali Klisto.

19 Sikawa tika ete Nzambe ásungá biso wana tozali kotángá mpe koyekola Liloba na Ye. Mikapo misato oyo euti koleka, ya

nsuka, tóloba, tozalaki kolobela, mbala na mbala, toyokaki, na ntina na Melikisedeke.

²⁰ Sikawa, nakanisi ete Paulo apesi ndimbola oyo esengeli.

Mpo ete Melikisedeke, mokonzi na Saleme, . . .

“Mokonzi ya Saleme.” Moyekoli nyonso ya Biblia ayebi ete Saleme wana, kala ezalaki . . . Yelusaleme, kala, ezalaki kobengama “Saleme.” Mpe Ye azalaki Mokonzi ya Yelusaleme. Bótala Ye malamau.

. . . nganga na Nzambe oyo-aleki-likolo, (elingi koloba molobeli), azuanaki na Abalayama . . .

Nalingi koyekola bokitani na Ye, ya Mobali monene oyo, mpo bóyeba liboso Oyo Ye azali, na nsima boko . . . tokokóba na lisolo yango.

. . . wana ebutwaki ye longwa na koboma mikonzi mpe apambolaki ye;

Abalayama akabelaki ye . . . ndambo na zomi . . . liboso . . . azalaki Mokonzi na boyengebene, yango ntina na nkombo na ye, . . .

Sikawa bótala malamau: “Boyengebene.” Sikawa, tozalaka na boyengebene oyo ya biso moko, tozalaka na boyengebene ya maloba, tozalaka na boyengebene oyo ebebisami, ya ndenge na ndenge. Kasi boyengebene moko ya solo ezali, mpe boyengebene yango eutaka na Nzambe. Mpe Mobali oyo azalaki Mokonzi ya boyengebene. Akokaki kozala Nani?

²¹ Sikawa, Azalaki Mokonzi ya boyengebene, Mokonzi na Yelusaleme, Mokonzi na boyengebene, Mokonzi na kimia. Yesu abengamaki: “Nkolo na kimia.” Mpe nkolo azali mwana na mokonzi. Bongo, Mobali oyo azalaki Mokonzi na kimia, na bongo Asengelaki kozala Tata ya Nkolo ya kimia. Bososoli?

²² Sikawa tótala, tózua bokitani na Ye na mwa mosika koleka, mpo tomona epai tozali kokende.

Na tata te, . . .

Sikawa, Yesu azalaki na Tata. Bondimi yango? Ya solo mpenza Azalaki bongo.

. . . na mama te, . . .

Yesu azalaki na mama. Kasi Mobali oyo azalaki na tata to mama te.

. . . na etangeli na mabota te, . . .

Azali na moto moko te oyo Ye autaki na ye, na etangeli ya mabota te. Azaláká ntango nyonso. “Na etangeli na mabota te.”

. . . na ebandeli na mikolo te, . . .

Azalá na ntango moko te oyo Ye atikálá kobanda.

. . . to nsuka na bomoi te; . . .

Ekokaki kozala eloko mosusu te bobele Nzambe. Yango nde nyonso oyo Ekokaki kozala.

²³ Sikawa, sikawa soki botali malamu wana tozali kotánga molongo oyo elandi. Bomoni? “Liboso, na ndimbola, azalaki Mokonzi ya boyengebene.” Yango te esika oyo nalingi kosala. Mo—molongo ya 3:

...to nsuka na bomoi te; kasi asili kokokana na Mwana na Nzambe;...

Sikawa, Azalaki Mwana na Nzambe te, mpamba te, soki Azalaki Mwana, Azalaki na ebandeli. Mpe Mobali oyo azalaki na ebandeli te. Soki Azalaki Mwana, Asengelaki kozala na tata mpe mama. “Mpe Moto oyo azalaki na tata to mama te. Kasi Ye asilaki *kokokana na Mwana na Nzambe.*”

...akoumelaka nganga libela.

²⁴ Sikawa, Dr. Scofield ameki koloba ete: “Ezalaki bonganga oyo bazalaki kobenga ‘Bonganga ya Melikisedeke.’”

Kasi nalingi komema bino na likambo yango mpo na mwa miniti. Soki ezalaki bonganga, na bongo esengelaki kozala na ebandeli, mpe esengelaki kozala na nsuka. Kasi, “Oyo ezalaki na ebandeli te, ezalaki mpe na nsuka te.” Mpe alobaki te ete akutanaki na bonganga moko. Akutanaki nde na Moto, mpe abengaki Ye na Nkombo ya “Melikisedeke.” Azalaki Moto, ebongiseli te, bo—bo—bonganga to botata te. Azalaki mpenza Moto na Nkombo ya Melikisedeke, oyo azalaki Mokonzi ya Yelusaleme. Bonganga te, kasi Mokonzi oyo azalaki na tata te. Bonganga ezalaka na tata te. “Mpe Moto oyo azalaki na tata te, na mama te, na ebandeli ya mikolo to nsuka ya bomoi te.” Sikawa, Mwana na Nzambe...

²⁵ Nani oyo ezalaki, oyo ezalaki Jehovah. Oyo ezalaki Nzambe na Nguya-nyonso Ye moko. Ekokaki kozala moto mosusu te.

²⁶ Sikawa bójala: “Akoumelaka libela.” Azali na litatoli moko awa, ete: “Azali na bomoi. Akufaka soko moke te.” Ye atikálá te. . . Atikálá kozala eloko mosusu te bobele na bomoi. “Akoumelaka libela.”

²⁷ Sikawa, Yesu asalemaki, lokola Ye. Sikawa, ntina oyo bokeseni ezali kati na Nzambe ná Yesu: Yesu azalaki na ebandeli; Nzambe azalaki na ebandeli te. Melikisedeke azalaki na ebandeli te, kasi Yesu azalaki na ebandeli. Kasi Yesu asalemaki lokola Ye. “Nganzambe, akoumelaka libela.”

²⁸ Sikawa, ntango Melikisedeke azalaki na mokili, Azalaki eloko mosusu te bo—bobele Jehovah Nzambe oyo atalisami na nzela na bokeli, Azalaki awa lokola theophanie. Abraham akutanaki na Ye mokolo moko, na hema na ye. Mpe ndenge tolobaki na ntongo ya lelo: “Abraham ayebaki Ye. Mpe Ayebisaki Abraham likambo oyo Alingaki kosala, mpo Alingaki te ete

mosangoli ya mokili ázanga komona makambo oyo Alingaki kosala.”

²⁹ Nátelema naino awa mpo na mwa miniti, mpo na koloba ete, Nzambe azali naino na likanisi yango moko mpo na Lingomba na Ye. Bozali bana ya molili te. Bozali bana ya Pole. Mpe ba . . . biso baoyo . . . “Esengo na basókemi, mpo bakosangola mabelé.” Bongo Nzambe yango, Oyo asalaki bongo epai ya—ya Abraham, oyo asengelaki kosangola mabelé. . . Mpe Alobaki: “Nakobomba makambo oyo te, na moto oyo akosangola mabelé.” Koleka boni Akomonisa basekele na Ye epai ya Lingomba na Ye oyo ekosangola mabelé!

³⁰ Danyele alobaki: “Na mokolo wana bato bakopota mbangu bipai na bipai, boyebi ekofuluka.” Mpe alobaki: “Bato ya bwanya bakoyeba Nzambe na bango, na mokolo wana, mpe bakosala makambo ya minene na mokolo wana. Kasi bato na nkanza bakoyeba Nzambe ya Likoló te.” Bayebi Ye na makambo ya libanda mpe na milulu, ndenge liteya na biso ya liboso elobaki, kasi bayebi Ye na nzela na kobonga be te.

³¹ Mpe Nzambe akoki bobele kosala na bobongi be, mpo Abongi be. Nkombo na Ye épambolama! Esengelaki kozala Nzela ebongi be, oyo Nzambe asalaka kati na yango, mpamba te Akoki kosala eloko mosusu te, bobele kosala na nzela na kobonga be. Akoki komiyesa Ye moko mbindo na lolenge moko te. Na bongo yango wana Yesu ayaki kolongola masumu na biso, mpo tókoka kobonga be, mpo Nzambe ákoka kosala na nzela na Lingomba na Ye. Kuna nde epai sekelé ezali.

Wana nde esika oyo mokili ekufi miso. Wana nde esika oyo balingaka koloba ete: “Obungisi makanisi na yo.” Wana nde esika balingaka koloba: “Oyebi oyo ozali kolobela te.”

Mpamba te: “Makambo ya Nkolo ezalaka bolémá mpo na bwanya ya mokili oyo. Kasi makambo ya mokili ezali ya nzoto mpo na mondimi.” Na bongo, ozali moto ya ndenge mosusu, ozali kobika na mosanda mosusu. Ozali lisusu moto ya mokili oyo te. Osili kolongwa na bomoi oyo koingela na Bomoi ya sika.

³² Yango wana, Nzambe amimonisaka, na mokili te, na psychologue te, na batei oyo batángá mingi te, kasi na bato na komikitisa na mitema. Na bato na Ye oyo bazali na bosokemi, Akomonisa basekelé ya makambo minene ya Nzambe, epai na bango. Bomoni yango?

³³ Sikawa, sikawa, Abraham asengelaki kosangola mokili. Na nzela na . . . Momboto ya Abraham nde bikólo nyonso esengelaki kopambolama. Bongo, Nzambe akitaki mpe asololaki na ye, na lolenge ya Moto.

Sikawa, Nzambe azalaka ntango nyonso na mokili. Nzambe atikálá kolongwa na mokili te. Soki Atikálá kolongwa na mokili, nayebi te nini elingaki kokómela yango. Kasi Nzambe azalaka

ntango nyonso awa na lolenge moko boye. Oh, lokumu na Nkombo na Ye!

³⁴ Azalaki elongo na bana na Yisraele na lisobe, ntango babimaki na Ezipito, na lolenge ya Pole. Alobaki na Abraham na lolenge ya Moto. Alobaki na Mose na lolenge ya Moto. Alobaki na Lingomba na lolenge ya Moto, Mwana na Ye, Klisto Yesu.

Mpe Azali koloba na nzela na Lingomba na Ye lelo, na nzela na Lingomba oyo epakólami ya Nzambe na bomoi, na nzela na mbeki ya lima. “Bino bozali bitape. Ngai nazali Mowiti.” Nzambe azali kokóba koloba, mpe mokili ezali komona Yesu wana ozali kotalisa Ye. Ndenge wana nde mokili emonaka. . . “Bozali mikanda oyo mikomami, oyo etángami na bato nyonso.” Bomoi na yo etalisaka oyo ozali.

³⁵ Sikawa, Abraham oyo na nzela na ye, kozongáká. Tokozonga nsima mpo na kotánga makambo na ye mwa moke, na Buku ya Genese. Na mokapo ya 14 ya Genese, nabanzi. Oh, lisolo yango ezali mpenza kitoko mingi awa! Sikawa, biso nyonso toyebi na ntina na Abraham, ndenge Nzambe abengaki ye kobima longwa na mokili ya Kaladi mpe na engumba ya Ulu, mpe ayebisaki ye ete ákabwana na bazalani na ye.

Ntango Nzambe abengaka mibali mpe basi, Abengaka nde bokabwani.

³⁶ Sikawa, yango nde kpokoso ná mangomba lelo, balingaka kokabwana na bandim-. . . na bazangi kondima ya kala wana ya nzoto te. Yango wana tokoki kokende mosika te. Tokotaka na molongo wana, ya nzoto, mpe to—tolobaka: “Oh, Jim azali mobali moko malamú, atako amelaka masanga. Atako a. . . Mpe nakendeke elongo ná ye na ndako ya masano ya billard, kasi ngai nabetaka na ngai billard te. Na—na—naeki elongo na mwasi wana na féti. Babetaka maseki ya bosoto, mpe bongo na bongo, kasi ngai nabetaka yango te.”

³⁷ “Bóbima na kati na bango.” Ya solo. “Mikabola. Bósimba biloko na bango ya mbindo te, mpe Nakoyamba bino,” elobi Nkolo. “Bosangana na bazangi kondima te, na ekanganelo oyo ezali ya bino te.” Bómeka kosala yango te. Mikabola.

³⁸ Mpe Nzambe abengaki Abraham mpo na ákabwana na bandeko na ye nyonso, mpe mpo átambola elongo na Ye. Ndeko, ntango mosusu elakisaka kotika lingomba. Elakisaki bongo mpo na Paulo. Asengelaki kotika lingomba na ye. Elakisaki bongo mpo na bato ebele. Ntango mosusu elakisaka kotika ndako. Ntango mosusu elakisaka kotika tata ná mama, mpe kotika nyonso. Nalingi koloba te ete elakisaka bongo ntango nyonso, kasi ntango mosusu elakisaka bongo. Elakisaka ete osengeli kolongola nyonso oyo ezali kati na yo ná Nzambe, mpe kotambola bobele elongo ná Ye moko. Oh, boyokani wana ya boboto, oyo epambolami, bondeko wana oyo ozalaka na yango ntango okabwani na makambo ya mokili mpe na bandimi ya

nzoto, oyo batiolaka yo, mpo na kotambola yo moko elongo ná Klisto!

39 Mbala ebele mpenza natóndá Nzambe! Alobaki: “Nakopesa bino batata mpe bamama na mokili oyo. Nakopesa yo baninga mpe bazalani. Nakotika yo te, nakobosana yo mpe te. Atako mokili mobimba epesi yo mokongo, Ngai nakotambola elongo na yo, kino na nsuka na nzela.”

40 Ezali litomba moko epambolami, ete moto ázala na momekano wana ya kolanda Nkolo Yesu, kokabwana na bazalani na ye nyonso ya nzoto, mpo na kolanda Nkolo! Mpe soki emonani ete moto moko azali na bizaleli ya malamau te, mpe bazali komitalisa lokola Baklisto, kasi balingi makambo ya nzoto, malamau óluka moninga mosusu na mbala moko. Ya solo. Mpe soki moto moko te alingi kotambola elongo na yo, ezali na Moko, oyo alakaki kotambola elongo ná yo. Elingi koloba, Nkolo Yesu oyo apambolami, Ye akotambola elongo na yo.

41 Nzambe ayebisaki Abraham: “Mikabolá.” Mpe Abraham, lokola moto nyonso, amemaki tata na ye elongo, amemaki mwana ya ndeko na ye, mwana-nkasi; bango nyonso badiembelaki likoló na ye. Mpe Nzambe atikalá kopambola ye te kino asalaki oyo Nzambe ayebisaki ye kosala.

42 Nalobi te ete ozali Moklisto te. Elingi koloba, nalongoli boklisto ya moto ata moko te. Kasi nakoloba boye, ete soki Nzambe ayebisi yo likambo moko ya kosala, Akotikaláká kopambola yo te kino ósala yango. Nazali na eteyelo na mpokwa oyo ná moko na makambo wana likoló na ngai. Mayangani na ngai etikali kozala te ndenge esengelaki kozala, na mibu mibale oyo eleki. Ezali mpo nazangi kokokisa oyo esengeli epai na Nkolo. Ayebisaki ngai ete: “Nákende na Afrika, nsima na yango na India.” Yango oyo, ekomami awa, na nsuka ya Buku oyo, sikawa.

43 Moyangeli abengaki ngai, alobaki: “Tika ba-Afrikanere wana. India ebelemi.”

44 Molimo Mosanto akutanaki na ngai, Alobaki: “Okokende na Afrika ndenge Nayebisaki yo.”

45 Mpe mobu mosusu elekaki. Mpe bayangeli. . . Nabosanaki Yango. Alobaki: “Tozali kokende na India. Tosili kozua ba-tiké.”

46 Nabandaki kokende, nabosanaki Yango kino nakómaki na Lisbone. Na mpokwa moko, nakanisaki ete nazalaki kokufa. Na ntongo oyo elandaki nabandaki kokende na esika ya kosukola, mpo na kosukola. Oh, nakomaki mpenza kobela, nazalaki kokoka kotelema na mpasi. Bongo, Pole wana etelemaki kuna, na esika ya kosukola, alobaki: “Nakanisaki ete nayebisaki yo ete: ‘Kende liboso na Afrika.’”

47 Mayangani na ngai ebandaki kokwea malembe-malembe uta ntango wana. Atako nakendeki na India, bato pene na ndambo

ya milió bazalaki kuna, kasi ezalaki te oyo Nzambe alobaki ete násala. Namoni ete mayangani na ngai ekozala na elonga te kino ete názonga noki-noki mpo na kobongisa likambo yango. Ata soki nasali nini, Ezali, Afrika nde liboso, mpo esengeli kosalema. Liloba ya Seko, ya Nzambe, ezali wana. Nayebaki yango malamumu mpenza. Kasi nasengeli kozonga. Mpe namoni ete mobu oyo ezali koya nde ntango oyo nakobima na ekókóló yango, na lisungi ya Nkolo.

⁴⁸ Nsango-malamumu ya nkembo mpe ya kala oyo ekoli malembe-malembe, lokola nzete ya chène, kasi nandimi ete abelemi mpo na kopalanganisa bitape na ye sikawa. Nandimi yango, Nsango ya nkembo mpe eloko ya nkembo oyo, Nandimi ete Nkolo akopesa biso lisusu nzela ya koningisa mokili mpo na nkembo ya Nzambe.

⁴⁹ Osengeli kosala oyo Nzambe ayebisi yo kosala. Mpe Abraham akendeki kaka, amemaki bandeko na ye. Alingaki bango. Yango nde ngámbo ya bomoto. Kasi nsima na mwa ntango, na kokobáká, tata na ye akufaki mpe akundaki ye. Na nsima azalaki na mwana ya ndeko na ye, na bongo koswana mpe kowelana ekotaki. Mpe, sukasuka, Lota aponaki mpe akendeki na Sodoma. Mpe bótala Abraham, abendanaki na Lota te. Alobaki: “Tozali bandeko. Tosengeli kowelana te. Kasi tombola motó mpe kende na ngámbo nyonso olingi kokende. Soki okei na esti, nakokende na westi. Soki okei na nordi, nakokende na sudi.” Yango nde ezaleli ya Moklisto, kolinga kopesa na moto mosusu eteni ya malamumu koleka. Pesaka ye yango ntango nyonso, tikaka ye ápona.

⁵⁰ Mpo na nini? Eloko nini esalaki ete Abraham ásala bongo? Ayebaki ete Nzambe alakaki ye ete akosangola eloko yango mobimba, ata ndenge nini. Amen. Boye, na bongo, ézala hema to ndako, mpo na nini tómitungisa? Eloko yango mobimba ezali ya biso. “Esengo na basókemi, mpo bakosangola mabelé.” Nyonso ezali ya biso. Nzambe alobaki bongo. Na bongo pesa moto yango apona oyo eleki malamumu, soki alingi. Ntango mosusu yango nde nyonso oyo akotikala kozala na yango. Kasi yango nyonso ezali ya bino, basangoli ya lobiko na nzela na elaka. Nyonso ezali ya bino.

⁵¹ Na bongo, Sara, mwasi ya kitoko koleka na mokili yango, afandaki wana likoló na ngomba elongo na mobali na ye, ndenge asengelaki kosala. Ya motuya te, ee, ntango mosusu alataki na ye robe ya motuya te, ya calico, to ndenge oyo bolingi kobenga yango. Nzokande, Mme Lota alataki lokola milionére. Mpe mobali na ye azalaki moyangeli ya engumba. Azalaki zúzi oyo azalaki kofanda na ekuke. Ye mwasi azalaki na nyonso; azalaki kokende na makita nyonso ya kotonga bilamba mpe na masano ya kálati oyo ezalaki kobetama na Sodoma mpe na Gomola. Kasi Sara azalaki kosepela mingi kotikala elongo na mobali na ye na lifúti ya moke, mpe ayebaki ete azalaki kati na mokano na

Nzambe, na esika ya kosepela na bozui ya, to na bisengo ya bozui mpo na ntango moke. Ya solo. Na ntango wana nde Nzambe ayaka kotala bato.

⁵² Mpe mokolo moko, yo, bobele ndenge olandi nzela ya mabe, ekokanga yo mokolo moko. Okoki kokanisa ete nyonso ekotambola malamau mpo na yo. Okoki kokanisa ete ozali na yo pepele, kasi ezali bongo te. Ekoki komonana lokola ete nyonso ezipami, kasi ezipami te. Nzambe ayebi nyonso. Ayebi soki kondima na yo eutaka mpenza na motema to te. Ayebi soki olobaka mpenza solo ete ondimaka Ye, mpe obikisámá, oyambá Ye, okúfá na makambo ya mokili, mpe ozali na bomoi kati na Klisto. Ayebi yango.

⁵³ Sikawa, tomoni ete Abraham, nalingi ete bómona molimo ya solosolo oyo. Oh, eloko yango epambolami na mobimba awa, ezali ngolu. Nalingi ete bótinga elongo na ngai sikawa na mokapo ya 14 ya Esode, mwa moke.

⁵⁴ Sikawa, eloko ya liboso oyo esalemaki ntango bakómaki kuna, ezali ete Lota azuaki kokoso. Mpo na nini? Azalaki libanda na mokano na Nzambe. Mpe soki ozui kokoso ntango ozali kati na mokano na Nzambe, Nzambe akosunga yo óbima na likambo yango. Kasi soki ozui kokoso, libanda na mokano na Nzambe, likambo ya kosala ezali bobele moko, zonga kati na mokano na Nzambe.

⁵⁵ Sikawa, bakonzi nyonso basanganaki, mpe bamonaki ete mabwaku oyo ezalaki na nsé kuna ezalaki kozua mai malamau, mpe ete bakokaki kokende kuna mpe kozua mwa Sodoma ná Gomola yango, kobotola yango. Mpe basalaki yango. Mpe ntango bakendeki kuna mpe babotolaki yango, bamemaki Lota elongo ná bango.

⁵⁶ Nalingi ete bó тала malamau Molimo na Klisto awa, kati na Abraham. Sikawa bó тала molongo ya 14.

Bongo, wana eyokaki Abraham ete ndeko na ye. . . (Bososoli?) . . . ndeko na ye akangami, abiangaki bilombe na ye, bato nkama misato na zomi na mwambe bapusaki na molende, baoyo babotamaki na ndako na ye, mpe abenganaki bango kino mboka na Dani.

⁵⁷ Oh, likanisi yango, ya ngolu, epambolami mpenza! Abraham, ntango ndeko na ye, atako asilaki kokwea longwa na ngolu, atako azalaki mozongi nsima, ntango ayokaki ete mokili ekangi ye, ete eutaki kokanga ye mpe komema ye, mpo éboma ye, Abraham asalaki na nzela na Molimo ya Klisto. Ayaki kopesa bibundeli na mibali nyonso oyo babotamaki na ndako na ye, alandaki bango, mpe alandaki bango kino na Dani. Mpe Dani ezali na nsuka ya mabelé ya Palestina, “longwa na Dani kino na Beleseba,” longwa na nsuka moko kino na mosusu. Mpe ezali elilingi ya Klisto, ntango Amonaki ete mokili ememaki. . .

ekweaki, na bongo Alandaki monguna kino na nsuka, mpo na koyamba lisusu libota ya Adama oyo ekweaki.

58 Nalingi ete bótala molongo oyo elandi, ndenge Molimo elobi na boboto awa, na nzela na ye. Malamu, molongo ya 15 sikawa.

Azongaki na biloko na bango nyonso (nyonso), azongaki mpe na Lota ndeko na ye, mpe na biloko na ye mpe na basi mpe na bato mosusu.

59 Ntango Abraham alandaki monguna oyo amemaki ndeko na ye, alandaki ye na ekólo mobimba, kino na mboka Dani, mpe azongaki na biloko nyonso oyo abungisaki ntango akweaki.

60 Elili kitoko mpenza ya Klisto, Oyo ayokaki uta na Likoló ete tubungaki, mpe ayaki kolanda monguna, teee kino na lifelo, mpe akangaki milimo oyo ebugáká, mpe azongisaki biso mpe azongiselaki biso biloko nyonso oyo tozaláká na yango liboso ya bokwei! Bisó, bazongi-nsima, biso baoyo tobotamáka mpo na kozala bana ya Nzambe, oyo tokómaki bana ya zaboló, mpe tosalaki. . . tolandaki makambo ya mokili, mpe tosalaki mabe, mpe tokómaki na lokoso lokola Lota akimaki, kotekáká makoki na biso ya bokulutu mpe kolandáká makambo ya mokili. Klisto ayaki na nse. Atako tokweaki; Nzambe, ayebaká na ebandeli nani akobikisama mpe nani akobikisama te, yango wana ayaki na nse mpe alandaki monguna kati na bomoi, kati na kufa, kati na paladiso, kino na lifelo. Longwa kuna na Nkembo kino na lifelo, akonzaki ba—ba-nguya ya lifelo, mpe abotolaki mafungola na zaboló, asekwaki, mpe azongiselaki bato makoki ya kozala bana mibali mpe bana basi ya Nzambe.

61 Bomoni Molimo kati na Abraham kuna, Molimo ya Klisto koyáká elongo ná ye?

62 Sikawa nalingi ete bótala mwa mosika, wana tozali kotánga.

Mokonzi na Sodoma abimaki kozuana na ye nsima na ye kozonga esilaki ye kobebisa mokonzi oyo Kedolaomea, mpe . . . bakonzi . . . bazalaki elongo na ye, kati na lobwaku ya Sawe, ntina na yango ete, lobwaku na mokonzi.

63 Babimaki. Mokonzi ya Sodoma azongisamaki. Ndeko na ye azongisamaki. Bana bazongisamaki. Mpe tala, bakonzi babimaki mpo na kokutana na ye. Mpe, lisusu, awa nde nalingi kokóma, liteya sikawa. Bótala malamau awa.

Mpe—mpe Melekisedeke, mokonzi na Saleme (Mokonzi ya Yelusaleme, Mokonzi ya kimia) abimisaki lipa mpe vinyo: ye azalaki nganga na Nzambe oyo-aleki-likolo.

Apambolaki ye, mpe alobaki ete, Tika ete Abraham apambolama na Nzambe oyo-aleki-likolo, mozalisi na balóla mpe na mokili:

64 Melekisedeke, Mokonzi ya Saleme, amitalisaki Ye moko mpe kati na bakonzi mosusu. Mpe bótala, etumba esilaki, Molimo ya Nzambe kati na Abraham, ya Klisto, oyo eutaki kozongisa ndeko na ye oyo akweaki, na nsima azongisaki ye na motindo na ye oyo esengeli, na nyonso oyo abungisaki. Azongisaki yango. Mpe ntango asalaki yango, Abimisaki lipa ná vinyo, elambo. Bozali komona te Nani Melekisedeke yango azalaki? Ezalaki Nzambe. Abimisaki elambo, nsima na etumba.

65 Sikawa tozua lisusu Matai 26:26, noki-noki mpenza, mpe tómona nini Yesu alobaki awa na ntina na yango. Na Buku ya Matai, mokapo ya 26 mpe lisusu molongo ya 26, tolingi kotanga mwa moke awa. Malamu, Matai 26:26.

Na nsima, Yesu akei na bango kino esika ebiangami ete Gologota, Gologota, to, Getesemane, (nalingi náloba,) mpe alobaki na bayekoli na ye ete, Bofanda awa naino nakei kuna kobondela.

66 Nabanzi ete nazui Likomi oyo esengelaki te. Matai, ntuku mibale- . . . molongo ya 26 ya mokapo ya 26. Soki moto moko azali na yango, tângela ngai yango, soki o—soki okoki komona yango. Bózela naino. Oyo ezali elilingi kitoko awa. Nalingi te ete bózanga yango. Yango oyo. Ezali yango, ndeko mwasi.

Ezalaki bango kolia, Yesu akamati lipa, mpe atondi, . . .

Ezalaki nini? Etumba esilaki.

. . . abuki yango, mpe apesaki yango na bayekoli na ye, mpe alobi ete, Bokamata, mpe bolia; oyo nzoto na ngai.

67 Bomoni Melekisedeke yango? Mibu nkama na nkama liboso, ntango Akutanaki na Abraham, nsima na etumba kosila, Apesaki lipa ná vinyo. Mpe awa, Yesu apesi bayekoli, nsima na etumba makasi na Ye kosila, Apesaki bango lipa ná vinyo. Bótala malamumu. Bótala malamumu Boyei oyo ekoya.

Akamati mpe kopo, mpe—mpe esili ye kotonda, apesaki epai na bango, ye ete, Bómela na yango, bino nyonso;

Mpo ete oyo ezali makila na ngai na kondimana na sika masopameli . . . masumu mpe kolimbisa masumu.

Nazali koloba na bino solo ete, nakomela lisusu na mai na mbuma oyo na miwiti te, kino mokolo yango wana nakomela yango lisusu kati na bokonzi na Tata na ngai esika moko na bino.

68 Tozali sikawa kati na etumba. Tozali kolanda ndeko na biso oyo akwei, oyo Nzambe, liboso na kozalisama ya mokili, amonaki mpe abongisaki ye liboso mpo na Bomoi na Seko. Mpe makambo ya mokili ekangi ye kati na ekumbaki. Akendé na biyenga elongo na bato minene, ye ná mwasi na ye, Kotamboláká na babalabala, komeláká makaya mpe masanga, mpe kosaláká bafeti,

koluka kozua kimia. Mpe Molimo ya Klisto kati na biso, ndenge Ezalaki kati na Abraham, tozali kolanda ye. Ná bibundeli nyonso ya Nzambe, Banje na Nzambe bafandi na zinga-zinga, tokei kozongisa ndeko na biso oyo akwei.

⁶⁹ Mpe sukasuka, ntango etumba ekosila, tokokutana lisusu na Melekisedeke, Nzambe apambolama, Oyo apambolaki Abraham kuna, mpe apesaki ye lipamboli, mpe apesi ye lipa ná vinyo, elambo. Mpe ntango etumba ekosila, tokokutana na Ye. Bisu baoyo tozali basangoli na elaka ya Abraham, basangoli elongo na Klisto kati na Bokonzi, tokokutana na Ye na nsuka ya nzela, mpe tokolia lipa mpe tokomela vinyo, lisusu, ntango etumba ekosila.

⁷⁰ Melikisedeke oyo azali Nani? “Ye Oyo azalaki na tata te, na mama te, na ebandeli ya mikolo to nsuka ya bomoi te.” Akozala Wana mpo na kopesa lisusu elambo. Bososoli yango?

⁷¹ Ntango topusanaka, na bampokwa moko boye, ntango tosanakana elongo mpo na kozua elambo na maboko ya batei, kotalisáká ete tondimaka kufa, kokundama, mpe lisekwa ya Nkolo Yesu, ete ezipelo wana, Nzoto na Ye oyo Azipamaki kati na yango, Nzambe, toliaka yango, lokola etaliseli ete: “Tosili kokufa na makambo ya mokili, mpe tobotami mbala ya sika na Molimo.” Mpe tozali kotambola elongo na Nzoto ya Klisto, bandimi nyonso elongo.

⁷² Ntango etumba monene ekosila, mpe toyeyi lisusu awa elongo na Klisto, tokolia elambo elongo na Ye na Bokonzi ya Nzambe, lisusu; mpe kolia nzoto, mpe komela makila ya mbuma na miwiti lisusu, kati na Bokonzi ya Nzambe. Oh! Melekisedeke Ye wana. Yango nde Nani oyo Ye azalaki.

⁷³ Sikawa tótánga lisusu mwa mosika makambo na Ye awa, na molongo ya 18.

Melekisedeke mokonzi na Saleme abimisaki lipa mpe vinyo: . . . (Bososoli yango?) . . . mpe azalaki nganga na Nzambe oyo-aleki-likolo.

Apambolaki ye, mpe alobaki ete, Tika ete Abraham apambolama na Nzambe oyo-aleki-likolo, mozalisi na balóla mpe mokili:

Apambolaki ye, . . . Apambolaki . . .

Nzambe oyo-aleki-likolo apambolama, oyo asili kopesa bayini na yo na maboko na yo. Mpe apesaki ye moko na zomi na biloko nyonso.

Afutaki moko na zomi na Melekisedeke. Abraham apesaki Ye moko na zomi ya biloko bipunzami.

⁷⁴ Sikawa nalingi ete bótala awa, wana Paulo azali kokoba, kopesáká moboko ya liteya oyo ezali koya sikawa.

Mokonzi na Sodoma alobaki na Abraham ete, Pesa ngai bato mpe yo kamata biloko na motuya mpo na yo.

Sikawa, mokonzi na Sodoma alobaki: “Sikawa, yo zongisela ngai bato na ngai, mpe yo zua biloko mpo na yo.”

Mpe Abraham alobaki na mokonzi na Sodoma ete, nasili kotombola loboko na ngai epai na Yawe, Nzambe oyo-aleki-likolo, . . .

El Elyon, “mozalisi na balóla mpe na mabelé,” kuna.

. . . Nzambe oyo-alaki-likolo, mozalisi na balóla mpe na mabelé,

Ete nakokamata eloko te na yango ezali na yo, ata ndambo na busi te, soko nsinga ya sapato te, . . .

Asalaki mayangani minene te mpo na kokongola mbongo. Azalaki bobele na mposa ya ndeko na ye oyo akweaki.

. . . nakokamata eloko te yango ezali na yo, na ntina ete yo okoloba te ete, ngai nayeisi Abraham mozui:

Bobele yango esili bana na ngai kolia, mpe likabo na bato oyo bakendeki na ngai elongo, . . .

⁷⁵ Sikawa, nalingi ete bótala malamau, Abraham alobaki: “Nakozua eloko te, ézala nsinga ya moke to nsinga ya sapato.” Abundaki etumba te, mpo na kosala mbongo ebele. Mpe babundaka bitumba ya solosolo mpo na bantina ya moyimi te. Babundaka bitumba mpo na mbongo te. Babundaka bitumba nde mpo na—mpo na bantina, mpo na malako. Bato babundaka bitumba mpo na ntina na malako. Mpe ntango Abraham akendeki kozua Lota, akendeki te mpo ayebaki ete akokaki kobéta bakonzi mpe kobotola biloko na bango nyonso, akendeki nde mpo na malako ya “kobikisa ndeko na ye.”

⁷⁶ Mpe motei nyonso oyo atindami na nse ya mpemela ya Mokonzi ya Likoló, akokende mpo na mbongo te; akokende mpe mpo na kosala mangomba minene te, akokende mpe mpo na kopemela bibongiseli te. Akokende bobele mpo na etinda ya mobeko moko, mpe yango ezali: “Kozongisa ndeko na ye oyo akweaki.” Ezala ete azui páta moko na makabo to ézala ete azui te, yango ekosala bokenseni moko te mpo na ye.

⁷⁷ Ndenge nalobaka: “Bitumba ya solosolo ebundamaka mpe esalemaka mpo na malako, kasi mpo na mbongo te.” Mpe mibali mpe basi oyo bakomaka bandimi ya lingomba mpe bayaka na lingomba, mpo ya koyebana, mpo libota ya Jones basambelaka kuna, to babongolaka mangomba na bango, longwa na lingomba moko ya moke kino na lingomba ya monene, bosalaka bongo mpo na ntina moko ya boyími, mpe lilako ya solo ezali nsima na yango te. Bosengeli kobeleva mpo na koteleva na ndelo ya etumba.

⁷⁸ Na tabernacle oyo, soki makambo etamboli malamau te, bino mibali mpe bino basi bokimi mpe bokei epai mosusu, to botikali libanda kino ntango mwa kobendana to kowelana yango ekosila, eloko moko ezali kotambola malamau te na makambo osila kobikela. Ya solo.

⁷⁹ Tozalaka na momesano moko awa. Tozali na—tozali na molongo moko awa. Losambo oyo etongami likoló na malako ya Biblia. Soki moto moko azali, oyo azali kobika malamau te, mpe yo omoni ete ezali bongo, kende epai na ye mpe solola na ye. Soki okoki kozongisa ye na bondeko te, na bongo, mema lisusu ndeko moko elongo na yo, moko to mibale. Soki alingi kozongisama na bondeko te, na bongo, yebisa yango na lingomba. Mpe lingomba ekobengana ye, ekozala lisusu na boyokani ná ye te. Mpe Yesu alobaki: “Nyonso bokokangola na mokili, Ngai nakokangola yango na Likoló.”

⁸⁰ Yango wana bozalaka na mikakatano ebele mpenza, ezali mpo bolandaka malako ya Biblia te. Soki moto moko kati na losambo azali kokotisa mobulu, to likambo moko ezali kotambola malamau te, ezali lotomo na yo te ya kokende kobeta lisolo na ntina ya mobali wan to mwasi wana. Ezali lotomo na yo ya kokende epai ya mobali to mwasi yango, mpe koyebisa ye libunga na ye. Mpe soki alingi koyoka yo te, mema moto mosusu elongo na yo. Soki alingi koyoka yango te, boye, lingomba ékangola ye. Yesu alobaki: “Oyo bokokangola na mokili, Ngai nakokangola yango na Likoló. Oyo bokokanga na mokili, Ngai nakokanga yango na Likoló.” Yango nde nguya ya lingómba.

⁸¹ Awa kala mingi te, motei moko malamau, moninga na ngai, azalaki na mwana ya mobali, mpe mwana yango azalaki kosambela, na losambo na ye. Akomaki na esika moko oyo akómaki kotambola ná elenge mwasi moko boye, oyo azalaki komela makaya, masanga mpe kokoba kosala bongo. Motei alobaki: “Na ntembe te, etali ye.” Moninga na ngai ya motema mpenza, mpe mwana mobali malamau. Kasi amemamaki mabe na elenge mwasi moko; mpe mwasi yango asiláká kozala na libala, azalaki na bana, mobali na ye azalaki na bomoi. Ye azalaki kobanga ete bango balingaki kozala na . . . mwana mobali wana ábala ye. Boye, ndeko yango alembaki nzoto mpenza. Mpe alobaki na ngai: “Ndeko Branham, nalingi ete ókende epai ya mwana na ngai *songolo*. Nalingi ete ósolola na ye.”

⁸² Nalobaki: “Ndeko . . .” Etikalaki moke nátánga nkombo na ye. “Ozali na lolenge ya malamau koleka. Kotinda ngai te. Soki elenge mobali yango azali kobika malamau te, mpe lingomba emonaki ye kosala mabe, na bongo, lingomba nde ekotala likambo yango. Etali nde lingomba. Mpe lingomba ékende koyebisa ye yango.”

⁸³ Boye amemaki ndeko moko, mpe bakendeki koyebisa ye. Mpe azongisaki monoko epai ya ndeko yango, ayebisaki ye ete ezali makambo na ye moko, ete ye mpe ásala oyo ya ye. Amemaki ndeko mosusu, bandeko mibale, basungi mibale bakendeki kosolola na elenge mobali yango. Aboyaki koyoka yango. Bayebisaki yango na lingomba. Mpe atikalá koya te, bampokwa ebelé, mpo na kozonga na boyokani ná lingomba

nsima na lisumu na ye koyebisama na lingomba. Na bongo, lingomba bakangolaki ye.

⁸⁴ Mpe pene na sanza moko nsima na yango, abelaki bokono ya pneumonie, mpe monganga alobaki: “Makoki ezali te mpo na ye kotikala na bomoi.” Bongo, azongaki mpenza na konguluma. Nzambe ayebi ndenge ya kosala yango.

⁸⁵ Tomekaka kosala yango biso moko, “Oh, bosengelaki kobengana *Songolo-pakala* na lingomba. Bosengelaki kosala *oyo, oyo wana, to oyo mosusu.*” Osili kosala eteni oyo esengami na bino lokola lingomba na likambo yango? Yango mpenza. Wana nde ndenge ya kozongisa bango na mabolongo, kaba bango naino epai na zabolo.

⁸⁶ Paulo alobaki nini mpo na mobali oyo azalaki kobika ná mwasi na tata na ye? Bazalaki kokoka kozongisa ye na bondeko te. Alobaki: “Bókaba ye na zabolo.” Bótala oyo ekosalema. Mpe na mokanda oyo elandaki Paulo akomaki ete mobali yango asembolamaki. Ya solo mpenza. Nzambe azali na lolenge ya kosala makambo yango, soki kaka tolandi mitindo na Ye.

⁸⁷ Soki eloko moko etamboli malamumu te na lingomba, soki ezali na kati ya eyanganelo, moko na moko na bino bandeko. Soki na likita na basungi, moko na bino basungi atamboli malamumu te, basungi mosusu báya mpe basla likita, bámeke kozongisa ndeko yango, báyebisa ye oyo azali kosala; to moko na bino bandimi, ózala nani. Na nsima esengeli komemama liboso na ye. Soki aboyi, nde yaka koyebisa mobateli. Na bongo, akokangolama na lingomba, na nsima bótika ye ázala lokola mopagano mpe mokongoli na mpako. Na bongo bótala malamumu ndenge Nkolo akosala ná ye. Bomoni, na ntango wana nde makanisi na ye ekozonga. Na ntango wana nde akozonga azonguluma na mabolongo. Kasi tomekaka kosala yango biso moko, boyebi, tomekaka kosala...nyonso ndenge tosengelaki kosala yango, sikawa, tolongaka ata moke te.

⁸⁸ Sikawa, Melikisedeke oyo, Mokonzi na Saleme, Mokonzi, Nganga na Nzambe oyo-Aleki-Likoló, akutanaki na Abraham mpe apambolaki ye. Mpe apesaki Ye moko na zomi na ye, Abraham. Mpe Azalaki Mokonzi na Saleme. Mpe Abimisaki lipa ná vinyo, elambo, mpe apesaki yango na Abraham nsima na etumba, nsima na mibali yango kozuama lisusu.

⁸⁹ Sikawa, “Bitumba nyonso,” ndenge nalobaka, “ebundamaka mpo na malako.” Sikawa, soki bozali na mwa etumba kati na lingomba, esengeli kozala mpo na ntina oyo esengeli. Bosengeli kobunda nde mpo na eloko oyo esengeli. Mpe mondimi nyonso ya lingomba yango asengeli kosala bongo. Sikawa, malakisi oyo ezali mpo na lingomba. Yango nde ntina oyo tozali awa. Yango nde ntina oyo natelemi awa. Yango nde ntina ya Liloba na Nzambe, ezali mpo na lingomba.

⁹⁰ Kotika ata moke te ete eloko moko épekisa lingomba oyo. Soki esalemi, yo nde ozali na ngambo, moko na moko na bino. Mpe yo, na mangomba na bino ndenge na ndenge, soki eloko moko etamboli malamumu te na lingomba na bino, yo nde ozali na ngambo, mpo ozali mokengeli ya lingomba yango. Etali mokengeli te. Etali likita ya basungi te. Etali nde yo, yo moko, kende epai ya ndeko wana mpe tala soki okoki kozongisa ye na bondeko. Soki okoki te, boye, mema bandeko mibale to misato elongo na yo, bongo bózonga kuna. Soki alingi koyoka te, yebisa yango na lingomba. Na nsima, akolongolama na Bokonzi na Nzambe. Nzambe alobaki: “Soki bolongoli ye kuna, Ngai nakolongola ye Awa, soki bolandi molongó oyo.” Na nsima nde Akokangola zabolo, akolanda ye mpo na kotongama . . . kobebisama ya nzoto na ye. Na bongo nde akozonga. Ya solo. Yango nde lolenge ya kozongisa ye. Soki azali mwana na Nzambe, akozonga. Soki te, boye—boye, akokoba na ye, na bongo zabolo akotinda ye na esika na ye ya Seko.

⁹¹ Sikawa bantina yango. Soki bokaneli moto moko, na bongo, wana ezali ndenge mosusu. Kasi, soki moto yango azali na ngambo! Mpe Lota akendeke kuna mpe azongaki nsima, atako azalaki Moebele. Akendeke kuna mpe azongaki nsima. Azalaki kati na ngolu, kasi asilaki kokweya longwa na yango. Mpe ntango abimaki . . . Mpe Lota—Lota abikisamaki. Bókanisaka te ete Lota abikisamaki te. Abikisamaki. Mpamba te, na ntango nyonso oyo azalaki na esika ya mabe, Biblia elobi ete: “Masumu ya Sodoma ezalaki kotungisa molimo na ye ya boyengebene mokolo na mokolo.” Sikawa, nzoto na ye ezalaki kosala eloko moko. Mpe nsuka na ye ezalaki nini? Amemaki bonsoni mingi koleka. Mwasi na ye abongwanaki na likonzi ya mongwa. Abotaki bana na nzela na bana na ye ya basi. Na bongo, bokoki komona oyo bonsoni yango epesaki, mpo asilaki kokwea longwa na ngolu mpe atikalá komizongisa lisusu te. Mpe Nzambe asengelaki kolongola ye na mokili.

⁹² Kasi, ata bongo, azalaki ndeko oyo asilaki kokwea, mpe Abraham asalaki nyonso oyo akokaki kosala mpo na kozongisa ye lisusu. Mpe Molimo oyo ezalaki kati na Abraham, ezali Molimo ya Klisto oyo ezali kati na lingomba lelo. Ata soki ndeko yango asalaki nini, yo okosala nyonso okoki kosala mpo na kozongisa ye kati na bondeko ya Klisto lisusu. Ata soki asali nini, okosala makasi nyonso.

⁹³ Sikawa, tolingi komona lisusu awa, wana tozali kokoba na liteya oyo ya Melikisedeke, Nganga monene ya Saleme oyo, mpe mozalisi ya Balóla mpe mabelé. Sikawa, kozala liboso:

Na tata te, na mama te, na etangeli na mabota te, na ebandeli ya mikolo te, to na nsuka na bomoi te; kasi asilaki kokokana na Mwana na Nzambe; akoumelaka nganganzambe libela.

Sikawa bótala malamu. Azalaki Mwana na Nzambe te, Azalaki nde Nzambe ya Mwana. Azalaki Mwana na Nzambe te, Melikisedeke azalaki yango te, kasi Azalaki Tata ya Mwana na Nzambe.

⁹⁴ Sikawa, nzoto oyo Azalaki na yango, Akelaki yango. Ebotamaki na nzela na mwasi te. Boye ná nzoto wana ekelamaki, Akokaki te... Nzoto moko, oyo Asalaki, Ye moko, mpo na komimonisa Ye moko.

“Moto moko te akoki komona Nzambe ata na ntango nini. Nzambe azali molimo.” Miso ya nzoto oyo emonaka biloko wana te, longola bobele soki ezali na lolenge lokola Likonzi na Móto, to nyonso oyo oyango ezalaki, to na lolenge ya ezali moko boye oyo bamonaki na nzela na emononeli. Kasi e... Nzambe asengeli komimonisa Ye moko na nzela moko boye. Mpe Nzambe amimonisaki Ye moko na Abraham, na lolenge ya moto. Amimonisaki Ye moko na Mose, na lolenge ya moto. Amimonisaki na bana ya Yisraele, na lolenge ya Likonzi na Móto. Amimonisaki Ye moko na Yoane Mobatisi, na lolenge ya ebenga. Bomoni, Amimonisaki Ye moko na ndenge wana.

Ntango Azalaki komimonisa Ye moko na lolenge ya Moto, lokola Mokonzi ya Saleme; ya Yelusaleme; ya Yelusaleme ya mokili te, kasi ya Yelusaleme na Likoló. Amimonisaki Ye moko na lolenge wana. Ye asilaki “kokokana na” Mwana na Nzambe.

⁹⁵ Sikawa, Mwana na Nzambe asengelaki koya na nzela na mwasi, mpo na kokelama awa; na nzela na libumu ya mwasi, mpamba te na nzela na eloko moko wana, kufa eyaki.

⁹⁶ Mpe Akokaki koya na nzela na bokeli te lokola Nzambe, na ebandeli. Ntango Nzambe asalaki mobali na ebandeli, mwasi azalaki na eloko moko te ya kosala ná yango. Nzambe alobaki kaka: “Tika ete ézala,” mpe moto abimaki na putulú. Abengaki ye, kozanga ete mwasi moko ázala na eloko ya kosala kati na yango. Kasi, mwasi, na ntango yango, azalaki kati na mobali.

⁹⁷ Mpe Nzambe abimisaki mwasi na mopanzi ya Adama. Ezali solo? Mpe mwasi abandaki kobota bato na nzela na mposa ya nzoto. Na bongo, nzela kaka moko, oyo Nzambe akokaki... Akokaki koya na theophanie wana te. Akokaki koya lokola Melikisedeke te. Asengelaki koya lokola Moto, mpe Asengelaki koya na nzela na mwasi. “Momboto na Yo ekonyata motó ya nyoka, mpe motó na ye ekozokisa litindi na Yo.” Bososoli? Nzambe asengelaki koya na nzela na mwasi; mpe Asalaki yango, ntango Afandaki kati na nzoto na Ye ya Mwana na Ye, Klisto Yesu. “Nzambe azalaki kati na Klisto, kozongisáká mokili na boyokani na Ye moko.” Mpe Apesaki Makila na Ye Moko lokola mbeka. Mpe Apesaki Bomo na Ye, mpo na nzela na kufa, Akoka kobikisa bino mpo na Bomoi na Seko.

⁹⁸ Boye, Nzambe ayaki, mpe Asilaki “kokokana na” Mwana na Nzambe. Bomoni? Azalaki Moto oyo akómaki *lokola* Mwana

na Nzambe. Sikawa, Akokaki kozala Mwana na Nzambe te, mpamba te Moto oyo azali Seko.

⁹⁹ Mwana na Nzambe azalaki na ebandeli, Azalaki na nsuka. Azalaki na—na ntango ya mbotama na Ye, Azalaki na ntango oyo Akufaki. Azalaki na ebandeli mpe nsuka. Azalaki na tata mpe mama.

¹⁰⁰ Moto oyo azalaki na tata to mama te, ebandeli to nsuka ya ntango te. Kasi Asalemaki, Moto oyo, Melekisedeke, asalemaki *lokola* Mwana na Nzambe.

¹⁰¹ Sikawa, Mwana na Nzambe, ntango Ayaki na mokili, na lolenge ya mwasi, to, na nzela na mwasi, na lolenge ya moto, mpe abomamaki, asekwaki na mokolo ya misato, asekwaki mpo na kolongisama na biso, sikawa Azali kouwela libela. Mpe na ntango nyonso oyo nzoto wana ezali kouwela, biso mpe tozali kouwela. Mpe lokola Asekwaki longwa na putulú, tokosekwa mpo na kozala lokola Ye. Yango nde lisolo ya Nsango-malamu. Nkombo na Nkolo épambolama. Banje te, bizali ya molimo te, ezali etonga moko ya nsálá te, oyo ezali kopumbwa-pumbwa bipai na bipai, kasi mibali mpe basi, amen, tokozala lokola Ye. Iyo, misie.

¹⁰² Ndenge nalobá likambo oyo mbala na mbala, nalobi yango lisusu awa mbala oyo. Emonani lokola ete elongobani. Nazalaki kosanola mwa nsúki mitano to motoba oyo natikali na yango. Mpe mwasi na ngai alobaki: “Billy, obandi kokóma na libandi.”

¹⁰³ Nalobaki: “Kasi nabungisi ata moko na yango te.”

¹⁰⁴ Alobaki: “Ezali wapi?”

¹⁰⁵ Nalobaki: “Yebisa ngai esika ezalaki liboso ete ngai názala na yango, nakoyebisa yo esika oyo yango ezali kozala ngai.” Ezali solo.

¹⁰⁶ Kala, nazalaká mo—mobundi, mobeti bibotú. Nazalaki makasi mpe monene. Mpe nazalaki komiyoka lokola ete soki batii ndakonzambe oyo na mokongo na ngai, nakokaki kotambola na balabala ná yango. Nalobi na bino, ntango nalamukaka na ntongo nyonso sikawa, nayebaka ete mibu koleka ntuku minei esili koleka. Bomoni? Nazali lisusu ndenge nazalaká te. Nazali kolemba, mokolo na mokolo. Ntango natalaka maboko na ngai, namilobelaka: “Tala awa. Boye, nabandi kokóma mobangé.” Natalaka mapeka na ngai. Namonaka ete nakomi na bozito mingi. Nazalaki kolata mokába ya centimetre ntuku nsambo na loketo. Nakomi kolata ya ntuku nsambo na mitano. Bomoni, Nabandi kokoma mobange, monene, kolemba.

¹⁰⁷ Ezali nini? Naliaka kaka bilei oyo nazalaki kolia. Nabikaka bomoi ya peto mpe ya malamukoleka oyo nazalaki kobika, ndenge moko. Kasi Nzambe asilá kokata ntango moko mpo na ngai, mpe nasengeli kondima yango. Kasi likanisi oyo

epámbolami ezali ete, na mokolo wana, Akosekwisa ngai. Mpe nyonso oyo nazalaki ntango nazaláki na mibu ntuku mibale na mitano, nakozala lisusu bongo libela. Amen. Yango mpenza. Kozala mobange ekotungisa ngai na nini? Nabetaka zabolo na likambo yango mibu na mibu, koyebáká likambo oyo, ete ngai nandimeli Ye. Mwa ntango oyo ezali mpenza moke, mpe mokuse, ata bongo. Soki toumeli bobele mibu ntuku nsambo, ntango oyo elakameli biso, mibu ntuku nsambo, e—ezalaka nini, soki bobele bolozí mpe mawa te? Ezali nini? Okolinga nde kofanda na ndako ya bokono oyo, na esika ya nzoto ya nkembo oyo kuna?

108 Ee, Nkombo na Nkolo épambolama! Eloko moko na kati na ngai ekutanaki na Melekisedeke wana mokolo moko, mpe Asakolaki kimia mpo na ngai mpe Apesaki ngai Bomoi na Seko. Mpe bomoi oyo ezali na ntina moko te, bobele nde mongombo mpo na koteya Nsango-malamu na nzela na yango. Nalobi likambo oyo na bosembo nyonso, ná ba-Biblia mibale oyo ezali polele liboso na ngai. Soki Nzambe asilisaki kosalela ngai mpo na koteya Nsango-malamu, mpe nakokaki lisusu kosalela Ye te, soki bana na ngai bakólaki mpe bakómaki komisunga bango moko, mpe Alingi kozua ngai sikawa: “Amen,” yango ekati likambo. Iyo, misie.

109 Bokeseni nini yango ekosla, soki nazali na mibu ntuku mwambe to soki nazali mibu ntuku mibale? Nazali awa bobele mpo na likambo moko: Kosalela Nkolo. Esili. Soki nakoki naino koteya Nsango-malamu ndenge nazali kosala sikawa, ntango nakokóma na mibu ntuku mwambe, bokeseni nini yango ekosala, názala na mibu ntuku minei to ntuku mwambe? Ezali na bato mingi na mibu ntuku mwambe na mpokwa oyo. Mpe bana mingi bakokufa, na ntango moto ya mibu ntuku mwambe akoumela kobika koleka mingi na bango. Bokeseni nini yango ekosala? Etali nde bantina na yo, malako na yo, mpe biso tozali awa mpo na kosalela Nkolo Yesu. Esili.

110 Toyebi likambo oyo ete: “Bomoi oyo ezali londende oyo ebimaka ntango moto akoloba; oyo ezalaki na ntango moko, na nsima ezali lisusu te.” Kasi soki tozali na Bomoi na Seko, Nzambe alakaki ete Akosekwisa biso. Mpe tokolia elambo elongo ná Ye ntango mikolo ekosila, mpe ntango Akoloba: “Kota na bisengo ya Nkolo, oyo ebongisamaki mpo na yo uta kozalisama ya mokili.”

111 Na bongo, bokeseni nini yango ekosala awa, tózala na eloko to tózala na eloko te? Tózala bilenge to tózala mibangé, bokeseni nini yango ekosala? Likambo ya motuya ezali, obelemi mpo na kokutana na Ye? Olingi Ye? Okoki kosalela Ye? Osila koteka biloko nyonso ya mokili? Osila kokutana na Melekisedeke bandá etumba esilá?

112 Nzambe ápambolama! Pene na mibu ntuku mibale na moko, nazalaki, mpe mokolo moko nazalaki kobunda na *oyo, oyo*

kuna, mpe oyo *mosusu*. Nazalaki kokoka kozua mokano te, soki nalingaki kozala mobundi, to soki nalingaki kozala mobomi nyama na mitámbo, to moto na bokila, oyo nalingaki kozala. Kasi nakutanaki na Melekisedeke, Apesaki ngai elambo, mpe banda wana likambo esilaki mpo na libela. Aleluya! Nakendeki na ngambo na Ye. Nakómá kosepela wana nákotambola na nzela. Mpe na nsuka ya nzela, ntango kufa ekotala ngai na miso, ndenge nazali komiyoka sikawa, nakobanga yango ata moke te. Nakotambola, nalingi kotambola liboso na yango, koyebáká likambo oyo, ete nayebi Ye Oyo apesaki elaka yango, ya solo, ete nayebi Ye na nguya ya lisekwa na Ye. Ntango Akobenga bato longwa na bakufi, nakobima kati na bango. Ya solo, koyebáká Ye na nguya ya lisekwa na Ye. Bokeseni nini yango ekosala, názala mobange to názala elengé? Názala moke to názala monene? Nátonda to názala na nzala? Názala na esika ya kopema to názala na yango te?

113 “Bandeke bazali na bazumbu, mpe gambala ezali na mabulu, kasi Mwana na moto azali na esika ya kotia motó na Ye te,” kasi Azalaki Mokonzi ya Nkembo.

114 Tozali bakonzi mpe banganganzambe na mpokwa oyo. Bokeseni nini yango ekosala, tózala na yango to tózala na yango te? Na ntango nyonso oyo tozali na Nzambe, tozali koleka balongi. Tozali koleka balongi. Tofandi Liboso na Nzambe, na boyokani katina bondeko ya Molimo Mosanto, koliáká elámbo ya Molimo uta na maboko na Ye oyo atatulaki ete: “Nazali Ye oyo akufaki, azongi na bomoi, mpe Nazali na bomoi libela na libela.” Tofandi elongo na bisika bileki Likoló kati na Klisto Yesu. Oh, Nkombo na Ye Mosanto épambolama! Bokeseni nini yango esali?

Hema to ndako, nakotungisa mpo ya nini?
 Bazali kotongela ngai ndako ya mokonzi Kuna!
 Etongami na ba-rubi mpe ba-diamá, na palata
 mpe wolo,
 Bibombelo na Ye etondi, Azali na bozwi oyo
 ekoki kolimbolama te.

115 Nakutanaki na Ye mokolo moko, ntango nautaki na etumba. Nakitisaki mitole na ngai na nse. Nabundá lisusu etumba moko te, uta wana; Ye nde abundelaka ngai. Napemaka bobele likoló na elaka na Ye, koyebáká likambo oyo, ete nayebi Ye na nguya ya lisekwa na Ye. Yango nde nyonso oyo ya motuya. Eloko nini mosusu ezali na motuya?

116 Nini tokoki kosala? Kokanisa mingi ekoki nde kobakisa bolai ya bomoi na yo mwa moke? Ekosala yo nini nsuki na yo ézala ya kolíngama, to ózala na yango to te? Bokeseni nini yango ekosala? Ózala mobange, ózala na nsuki ya pembe, ózala na mapeka egumbámá, ózala bongo te, ekosala nini? Amen. Oyo ezali bobele mpo na mwa ntango, mwa ntango moke, kasi oyo Wana ezali mpo na libele na libela. Wana ntango oyo ekoki kotángama te ekoleka,

wana bileko ekoleka, okobongwana te, mpe okoleka na bileko na Ye ya Seko, oyo ezangi suka. Bokeseni nini yango ekosala?

117 Nazali na esengo mingi nakutáná na Ye. Nazali na esengo mingi mpo Apesaki ngai elambo, mokolo moko, Melekisedeke moko wana oyo akutanaki na Abraham, ntango autaki koboma bakonzi. Ya solo mpenza. “Nzambe ya Lola,” *El Elyon*; “NAZALI” monene, Nazalaki te; NAZALI, eleko bébe. “Mpe Apambolaki ye.”

118 Bóyoka awa, mwa moke liboso, mpo tókoka koyekola liteya mwa malamau koleka, elongo. Sikawa molongo ya 4.

Sikawa bótala ndenge mobali yango azalaki monene, . . .

Ngai mpe nakanisi bongo. “Bótala ndenge Mobali yango azalaki monene.” Aleki Mwana na Nzambe. Mwana na Nzambe azalaki na tata mpe mama; Ye te. Mwana na Nzambe azalaki na ebandeli ya ntango mpe na nsuka ya ntango; Ye te. Azalaki Nani? Wana ezalaki Tata ya Mwana. Wana nde Oyo Yango ezalaki.

. . . botala ndenge moto yango azalaki monene, epai na . . . ata mpaka Abalayama apesaki moko na zomi ya biloko nyonso bipunjami.

119 Sikawa bóyoka na bokebi.

Mpe ya solo bango oyo bauti na bana na Lewi, baoyo bakozuaka mosala na bonganga, bazali na . . . mobeko ya kokomata ndambo na zomi kouta na bato kokokana na mobeko, elingi koloba, bandeko na bango, atako bango babimaki na loketo ya Abraham:

120 Sikawa bótala oyo malamau soki bolingi komona eloko moko.

Kasi ye oyo na libota te akobaki mpo . . . longwa na bango azali kozua ndambo na zomi epai na Abalayama, mpe apambolaki ye oyo azalaki na elaka.

121 Abraham azalaki na elaka, mpe Moto oyo apambolaki Abraham oyo azalaki na elaka. Ezalaki Nani oyo? Bana mibali ya Lewi bazalaki kofuta moko na zomi epai ya bandeko na bango to . . . Bandeko na bango nde bazalaki kofuta moko na zomi epai na bango. Bazalaki na mobeko ya Nkolo ya kozua moko na zomi ya oyo bandeko na bango bazalaki kozua, mpo na kobika na bango, mpo bango bazalaki bonganganzambe. Sikawa, yango etii pembeni bonganga ya Melekisedeke, ndenge bososoli yango, kaka wana. Ya solo. Kasi Moto oyo . . . Ata ye oyo azalaki na elaka, moto ya monene koleka na mokili, Abraham, akutanaki na Moto oyo mpe afutaki moko na zomi epai na Ye. [Maloba mazangi na eteni oyo ya bande—Mok.] Asengelaki kozala monene koleka ye.

122 Bóyoka.

Ezali likambo ya ntembe soko moke te ete oyo aleki moke apambolama na oyo aleki monene.

Solo mpenza. Bótala malamumu Nani Ye azali.

Awa ndambo na zomi epai na bato bakokufaka; . . .

Ezali bonganga ya molongo ya ba-nganganzambe, batei, mpe bongo na bongo. Bato oyo bazuaka moko na zomi, bakufaka. Bomoni?

. . . nde awa, azuaka yango, na ye oyo atitolami mpo na ye ete azali naino kobika.

¹²³ Moto akozua moko na zomi mpo na nini, soki azalaki na . . . Soki abotámá mokolo moko te, akokufáká mpe mokolo moko te, mpe azalaki banda na ebaneli kino na nsuka, mpe—mpe azalá na tata te, to na mama te to na etangeli ya mabota te, mpe azalaki mokolo ya Balóla mpe ya mabelé mobimba, mpe nyonso oyo kati na yango, mpo na nini akozua moko na zomi? Mpo na nini asengaki Abraham áfuta moko na zomi? Bomoni ndenge kofuta moko na zomi ezali likambo ya eyóngi? Kofuta moko na zomi ezali malamumu. Moklisto nyonso azali na lotomo ya kofuta moko na zomi. Ezali solo. Etikalá kobomngwana ata moke te.

¹²⁴ Sikawa:

Mpe lokola nakoki koloba bongo, Lewi mpe, oyo azuaki moko na zomi, afutaki moko na zomi kati na Abalayama.

¹²⁵ Sikawa, oh, bótala eloko moko.

Mpamba te azalaki naino na loketo ya tata na ye, ntango Melekisedeke akutanaki na ye.

¹²⁶ Nini? Lewi? Abraham azalaki tata ya tata ya nkóko ya Lewi. Mpe Biblia elobi awa, ete: “Lewi afutaki moko na zomi ntango azalaki na loketo ya Abraham.” Mabota minei liboso ete ábotama na mokili, azalaki kofuta moko na zomi epai ya Melekisedeke. Nkombo na Nkolo épambolama!

¹²⁷ Na nsima, bino baoyo bokoki kondima koponama liboso te, to kobongisama liboso; mpe awa, mabota minei liboso ete Lewi ábima na loketo ya Abraham, azalaki kofuta moko na zomi epai ya Melekisedeke. Elingaki kozala malamumu soki tozalaki na ntango ya koyekola na kati ya Makomi.

¹²⁸ Soki bozui yango, ndakisa, na Yilimiya 1:4, Nzambe alobaki: “Nayebaki yo liboso ótongama kati na libumu ya mama na yo. Mpe Ngai nabulisaki yo mpe nabongisaki yo lokola mosakoli epai na mabota.” Na bongo, okoki koloba ete osalaki nini? Nakoki koloba ete nasalaki nini? Nzambe nde ayokelaka biso mawa. Nzambe ayebaki biso liboso na kozalisama ya mokili.

¹²⁹ Alingaka te ete moto moko ákufa. Soko moke te. Kasi soki Azali Nzambe, Ayebaki nani alingaki kobikisama mpe nani alingaki kobikisama te, soki te, Ayebaki eloko moko te. Soko

Ayebaki te. . . Soki ayebaki te nani akokende na Konetolama, liboso ete mokili etikala kosalema, na bongo Azali Nzambe te. Soki Azali na nsuka te, Ye alingaki. . . Ayebaki liyanzi nyonso, nzinzi nyonso, nsili nyonso, lindonge nyonso oyo elingaki kozala na mokili, liboso ete mokili etikala kosalema. Ya solo. Ayebaki makambo nyonso. Liboso na kozalisama ya mokili, Ayebaki biso. Biblia elobi ete: “Ayebaki biso mpe Abongisaki biso liboso.”

¹³⁰ Tósukisa likambo oyo mbala moko. Tózonga na Baefese, mokapo ya 1. Mokapo ya 5. . . Mokapo ya 1 ya Baefese, bózela, mwa ngonga moke. Nalingi kotánga awa mwa moke, mpo bókoka kososola mpenza ete ezali kaka te eloko moko boye, oyo nazali komeka koyebisa bino. Ezali eloko oyo Nzambe azali koluka koyebisa bino. Bomoni? Sikawa bóyoka likambo oyo, na bokebi mpenza, mokapo ya 1 ya Baefese.

Paulo, ntóma ya Yesu Klisto na mokáno na Nzambe, . . .

Moto yango moko oyo akomaki mokanda ya Baebele, azali kokoma mokanda oyo.

. . . epai na basanto . . .

Oyo ezali mpo na bazangi kondima te, kasi mpo na basanto, baoyo babul- . . . babulisami.

. . . oyo bazali na Efese, mpe na bosembwi kati na Klisto Yesu:

Ngolu ezala na bino, kimia, epai na Nzambe Tata na biso, mpe útá na Nkolo Yesu Klisto.

Nzambe mpe Tata ya Nkolo na biso Yesu Klisto ápambolama, oyo asili kopambola biso na mapamboli nyonso ya molimo na bisika na likolo. . .

“Kokokana lokola Ye. . .” Sikawa, bóyoka na bokebi sikawa, molongo ya 4.

Kokokana lokola eponaki ye biso kati na ye liboso na kozalisama na mokili, . . .

Liloba oyo “bisó” wana ezali nani? Lingomba.

. . . aponaki biso kati na ye (Klisto) liboso na kozalisama ya mokili, mpo tózala bulee mpe kozanga ekweli liboso na ye na bolingo:

Abongisaki biso liboso mpo na lokumu ya bana, na nzela na Yesu Klisto epai na ye moko, kokokana na mposa na Ye moko, na mokano na Ye,

¹³¹ Nani asalaki yango? Nzambe nde asalaki yango. Nzambe ayebaki uta na ebandeli nani akobikisama mpe nani akobikisama te. Na ntembe te, Alingaki te ete moto moko ákufa. Kasi Atindaki Yesu awa te kaka mpo na kotala soki boko—bokoloba ndakisa: “Ee, mawa Yesu, nayokeli Ye mawa. Ntango

mosusu ekozala malamumu ete ná bikisama mpe ná ndima yango.” Te, misie.

¹³² Nzambe ayebaki, na ebandeli, nani akondima mpe nani akondima te. Boye, yango wana, Ayebaki ete bamoko bakondima, boye Atindaki Yesu kosala mbondi mpo na baoyo Ayebaki liboso. “Mpo baoyo Ye ayebaki liboso, Abengaki bango. Mpe baoyo Abengaki, Alongisaki bango. Mpe baoyo Alongisaki, Asilá (na eleko eleká) kokembisa.” Yango mpenza.

¹³³ Boye ezali te yo moko omibatelaka, ezali ngolu na Nzambe nde ebatelaka yo. Omibikisaki yo moko te, to eloko moko osalaki mpo óbonga na kobikisama. Ezali Ngolu na Nzambe nde ebikisaki yo. Ngolu na Nzambe nde ebengaki yo. Boyebi na Nzambe liboso eyebaki yo. Ayebaki ete okozala na kati na losambo oyo na mpokwa oyo, liboso ete mobóko ya mokili étikala kotiyama, soki Ye azali na nsuka te. Soki Azali na nsuka, Azali Nzambe te. Soki ayebaki mpenza makambo nyonso, Azalaki Nzambe. Soki Ayebaki makambo nyonso te, Azalaki Nzambe te. Soki Azali Nzambe na Nguya nyonso, Akoki kosala nyonso. Soki Akoki kosala nyonso te, Azali Nzambe na Nguya nyonso te. Yango mpenza.

¹³⁴ Boye ndenge nini okoki koloba ete ezali eloko moko oyo yo okokaki kosala? Ezali eloko moko te oyo yo okoki kosala. Ezali bolingo mpe ngolu na Nzambe mpo na yo, ete ozali ata awa. Ezali eloko moko te okokaki kosala, Nzambe Abengaki yo na ngolu na Ye; oyokaki, olandaki, oyambaki.

¹³⁵ “Ee,” okoloba, “Ndeko Branham, ezali kokómisa yango mpenza pete mingi.” Ezali mpenza bongo. Ozali nsomi. “Boye, mobali wana akoki kosala nyonso oyo alingi.” Ya solo. Ngai nasalaka ntango nyonso oyo ngai nalingi kosala. Kasi soki ozali Moklisto, okolinga kosala mabe te.

¹³⁶ Mwa mwasi moko ya moke afandi kuna na mpokwa oyo, mwasi na ngai. Nalingaka ye na motema na ngai mobimba. Mpe soki nayebaki ete nakoki kotambola na mwasi mosusu mpe komilongisa na yango, bongo ná kende koyebisa ye, mpe náloba: “Meda, nasalaki mabe,” bokanisi ete nakosala yango? Soki nalingi ye mpenza, nakosala yango te. Ya solo.

¹³⁷ Sikawa, bongo soki nalobi: “Oh, nakoki kosala yango te. Mpo, nakoyebisa bino mpo na nini. Mpo akokabwana na ngai, mpe nazali na . . . Oh, nazali motei. Bomoni oyo yango ekoki kosala? Yango ekolongola ngai na eteyelo, soki akabwani na ngai. ‘Mobali oyo abomá libala, oh!’ Nazali na bana misato; nakoki kokanisa yango te. Kasi, tala, ngai . . .”? Boye, soki ezali bongo, ozali naino kati na mibeko. Ezali likoló ya mobóko ya mibeko te nde nabalaki ye. Ezali mobóko ya mobeko te nde esalaka ete ná bika sembo epai na ye. Ezali mpo nalingi ye. Nazali na ntina ya kosala eloko moko te. Nasalaka yango na mokano malamumu mpo

ezali likambo ya bolingo. Mpe soki olingi mwasi na yo, okosala ndenge moko.

¹³⁸ Mpe soki olingi mwasi na yo ndenge wana, ná bolingo *phileo*, osengelaki kosala nini mpo na Klisto ná bolingo *agapao*, oyo eleki makasi mbala milio, soki olingi mpenza Nzambe? Soki nayebaki na mpokwa oyo ete nakoki kokende kolángwa masanga, soki nayebaki na mpokwa oyo ete nakoki kobima mpe kobika bomoi mabe, soki nayebaki na mpokwa oyo; soki yango ezalaki ata kati na motema na ngai, mpe nabimi mpe nasali yango, wana nayebi ete Akolimbisa ngai, Nakosala yango te. Nasepelaka na Ye mingi. Nalingi Ye. Ya solo. Solo mpenza.

¹³⁹ Yango wana nakoteka makambo oyo nabikelá na ebongiseli moko te, (te, misie), na ba-Assemblée de Dieu te, na Eglise de Dieu te, na ba-Pèlerin de la Sainteté te, ba-Metodiste, ba-Batiste, ba-Presbiterien, ba-Katoliko. Nakozua ata eloko moko te oyo bakoki kopesa ngai, mpo nákaba makambo oyo nabikelá. Mpamba te, yango eutaka na moto te. Eutaka na Nzambe. Te, misie. Nakolinga koteka makoki na ngai ya bokukutu te mpo na mabina ya rock-and-roll ya Elvis Presley, to mpo na ba-masuwa na ye ya ba-Katoliko, to, to ya ye ba-Cadillac, to ba-milió ya ba-dollar na ye, mpe bongo na bongo, oyo azuaka sanza na sanza. Te, misie. Nalingi Ye. Mpe soki ngai. . . Na ntango nyonso oyo nalingi Ye ndenge wana, nakotikala sembo epai na Ye. Mpe soki Nzambe abengi ngai mpe aponaki ngai, Atii eloko moko kati na ngai, mpe ngai nalingi Ye.

¹⁴⁰ Nakanisi lisusu M. Isler. Bino nyonso boyebi ye, mingi kati na bino. Ayaki awa, senateur ya etúka ya Indiana; ayaki awa, abetaki guitar na ye. Ntango bebé na ngai autaki kokufa, mwasi na ngai autaki kokufa, mpe bango nyonso balali awa na mayíta. Mpe nazalaki kotambola na nzela, natiaki maboko na nsima, nazalaki kolela. Akitaki mbangu na mwa motuka na ye, kimalu-malu ya kala, mpe ayaki kozingela ngai na maboko na ye, alobaki: “Billy, nalingi kotuna yo motuna moko.” Alobaki: “Nayóká yo koteya na lolenge ete etikalaki moke ókwea na eteyelo. Nayóká yo na matákanelo ya balabala mpe nyonso wana, koganga mpo na Klisto.” Alobaki: “Sikawa Azui tata na yo. Azui ndeko na yo. Abotoli bango nyonso mibale, mpe bakufaki na maboko na yo. Akufaki wana. Mwasi na yo akufaki, wana asimbaki maboko na yo. Mpe bebé na yo moke akufaki, wana ozalaki kobelela Ye mpo ásunga yo. Mpe Apesaki yo mokongo. Okanisi nini mpo na Ye?”

¹⁴¹ Nalobaki: “Nalingi Ye na motema na ngai mobimba. Soki Atindi ngai na lifelo, nakokoba kolinga Ye.” Azali sembo. Ezali maloba ya mpamba te; mibu ntúkú mibale na motoba esili kotalisa yango polele. Ezali ya solo.

¹⁴² Soki olingi Ye! Lokola lotómo te, ete: “Nakoki kosala *oyo* te, mpe nakoki kosala *wana* te.” Olingi Ye mingi mpenza na lolenge

ete okoki kosala yango te, mpo Ye nde aponaki yo. Yo oponaki Ye te, Ye nde aponaki yo.

143 Olobaki: “Nalukaki Nkolo, mpe nalukaki Nkolo.”

Moto moko te alukaka Nzambe. Nzambe nde alukaka moto. Ntango mosusu ozali koluka boboto na Ye, kasi Nzambe nde asengeli kobongola lolenge na yo, liboso ete ókoka ata koluka Ye, mpamba te, ozali mosumuki, ozali ngulu. Ya solo.

144 Mpe bamosusu kati na bino baoyo bosambelaka mpe bobikaka kaka na bozali na bino kati na lingomba, bobimaka awa mpe bosalaka makambo nyonso na mokili, na nsima bozongaka mpe bolobaka: “Iyo, nazali moto ya lingomba.” Malamu, ezali mosika mingi na kozala moto ya Nzambe. Ya solo. Nsalaka te. . . Kasi omonaka bato oyo basalaka bongo, oyebi yango malamau. Oh, bazali bato malamau ya lingomba. Ezali ya solo. Okoki kozala moto ya lingomba mpe kosala makambo wana, kasi okoki kozala Moklisto te mpe kosala yango.

145 Lokola nalobaki, na ntongo ya lelo: “Mobange ya eyángánga, soki etikálá kozala na mokosi moko, ezali nde eyángánga.” Ezali ya solo. Ye ná ebengá bafandaki na masuwa moko, batelemaki na mwa etápe moko. Mpe eyángánga asepelaki ntango bakangolaki ye, mpe abimaki na Lingomba wana, azuaki libaku ya kobima kuna mpe akitaki likoló ya ebembe moko epolá mpe asalaki “caw, caw,” mpe azalaki kolia *oyo* boye, kolia púnda, mpe kolia ngombe, mpe ezalaki ata nini, asepelaki. Kasi ntango Nowa akangolaki ebengá, amonaki esika ya kokitisa matambe na ye te. Azalaki mpe na makoki ya kokita likoló na ebembe ya nyama, lokola eyángánga, kasi bazalaki na ndenge mibale oyo ekeseneki. Moko na bango, azalaki ebengá, mpo na kobanda. Ye azalaki eyángánga, mpo na kobanda.

146 Kasi, soki botali malamau, mobange ya eyángánga akoki kokita awa likoló na ebembe moko mpo na kolia, ndambo ya mokolo. Ebenga akokita na elanga ya blé mpo na kolia, ndambo ya mokolo. Mpe eyángánga akoki kopumbwa kuna mpe kolia bilei ya ebengá, ndenge nyonso tye alingi. Akoki kolia blé mingi lokola eyángánga, to, lokola ebengá. Kasi ye, eyángánga, akoki kolia bilei ya ebengá, kasi ebengá akoki kolia bilei ya eyángánga te. Ezali ya solo.

147 Boye, mokosi moko akoki koya na losambo, kosepela, kogánga, kokumisa Nkolo, mpe kosala ndenge wana, mpe kozonga kuna mbangu mpe kosepela na makambo ya mokili. Kasi Moklisto oyo abotami mbala na mibale akoki kosala yango te, mpo bolingo na Nzambe ekotindika ye na lolenge ete akoki kosala yango te.

148 Boye soki ozali Moklisto kaka mpo okoti na lingomba, mpe mpo otiki kosala *oyo* mpe *oyo wana* kasi mposa yango moko ezali kati na yo, osengeli na kozindisama mosusu. Ezali mpenza ya solo.

149 Mpe bino basi oyo bokokaka kolata mwa bakupé ya mikuse wana, mpe bobimaka na balabala, na nsima omibengi “mondimi.” Ozali mondimi, kasi ozali ndakisa mabe ya mondimi, ntango mosusu. Soki ozalaki mpenza na Klisto kati na motema na yo, olingaki kosengela kokanisa makambo ya ndenge wana te. Etali ngai te nini basi mosusu basalaka, mpe nnini bilenge basi oyo batikali basalaka yo okozala ndenge mosusu, mpo olingi Klisto mingi mpenza.

150 Nasololaki na mwasi moko mokolo mosusu wana, na ndako moko, mpe abwakaki maboko na ye likoló *boye*, alobaki: “Rev. Branham, nazalaka pene bolumbu, awa na ndako na ngai. Natambolaka bongo.”

151 Nakanisaki: “Nsoni na yo.” Ézala na ndako na yo moko, ata soki ozali wapi. Ya solo. Lata mpe bika lokola mwasi, ndenge mwasi ya kilo asengeli kosala. Nsóni na yo. Kasi bozali kokóba . . . Iyo, Biblia elobi: “Soki olingi biloko wana, biloko ya mokili, bolingo ya Klisto ezali ata kati na yo te.” Mpe soki olingi Nkolo, na motema na yo mobimba mpenza, na molimo na yo mobimba, na likanisi na yo mobimba, okotia mwa biloko ya mbindo mpe ya bosoto wana mosika na yo. Ya solo.

152 Mpe yo mosungi, mpe bino bamosusu awa, oyo bobimaka mbangu na balabala awa, mpe bosembolaka nkingo mpo na kotala basi wana moko na moko. Nsoni na bino; mpe bozali komibenga “bana mibali ya Nzambe”. Nayebi ete ezali kotumba, kasi malamú bótumbama na yango na esika ya kozika mpo na libela kuna. Boye, soki osalaka makambo wana . . . Sikawa, okokaka kokanga motema te soki mwasi moko atamboli na balabala, alati mabe. Yo, soki otali, osengeli komona ye, kasi okoki kobalola motó na yo. Biblia elobi: “Moto nyonso oyo akotala mwasi mpo na kolula ye, asílí kosala na ye ekobo na motema na ye.”

153 Tika náyebisa yo likambo moko, molingami ndeko mwasi, okosamba. Etali ngai te, okoki kozala peto lokola felele ya lísi. Ekoki kozala ete osalá lisumu ya lolenge wana ata moke te, lisumu ya bomoi ya mbindo, na bomoi na yo. Kasi soki olati lolenge wana, okosamba na Kosambisama, mpo osalaki lisumu ya ekobo ná mobali nyonso oyo atalaki yo. Biblia elobi bongo. Mpe obimi na balabala, nani akweisami, mobali? Te, mesie. Yo nde. Omitalisaki lolenge wana.

154 Mwasi azali na esika ya lokumu. Ezali esika ya bule, ya kitoko mpe ya malamú mingi. Kasi asengeli komibatela lolenge wana, mpo na kobatela esika na ye ndenge asengelaki, lokola mama, lokola mwasi mpe na bomwasi. Soki bomwasi ebukani, mokuwa ya mokongo ya ekólo nyonso ebukani. Yango nde ntina, lelo, ekólo na biso ebebi, ezali mpo basi na biso bazangi bomoto. Ezali mpenza ya solo. Ya solo. Bipolí yango katikati na biso, nde ezali kobuka yango.

155 Oyo osengeli na yango ezali ete ókutana naino na Melekisedeke yango. Amen. Tika Ye—tika Ye ápambola yo mpe ápesa yo vinyo ná lipa, Bomoi na Seko. Na bongo, okomona makambo ndenge mosusu. Bongo, oko... Ekokóma ndenge mosusu. Okolinga lisusu te ete bilenge mibali básala...ete bábenga yo na piololo lokola bambwa ya yawuli, bambwa ya zamba, to ndenge nyonso bokolinga kobenga yango. Ata moke te. Okokóma ndenge mosusu.

156 Mpe olingi koyebisa ngai ete olataka bongo, mpe obimaka kuna, na ntina mosusu? Okoloba: “Ee, epesaka mwa malili koleka.” Ozoloba bilobélá. Epesaka na yango malili koleka te. Science etalisi polele ete epesaka na yango malili te. Ezali... Bilulela nde ekangi yo, ndeko mwasi. Bozoyeba yango te. Nazali koluka kosala bino mpasi te, kasi nazali koluka kokebisa bino. Basi mingi ya malamumu, mama mwasi ya peto mpenza, mama moke ya kitoko, oyo abimaka ná biloko wana, na balabala, kozanga koyeba oyo azali kosala, mpo motei moko boye, oyo azóngá nsima, azali kobanga ete mobali na yo ákolinga kofuta moko na zomi na lingomba lisusu te. Soki atikálá kokutana na Melikisedeke, alingaki kokanisa makambo wana te. Alingaki koteya Nsango-malamumu. Ata soki elongolaki bango mposho ya mokongo, alingaki koteya Yango, ata bongo. Ya solo mpenza.

157 Osalaka yango, mpe osalaka yango mpo molimo ya bilulela esila kokanga yo. Mpe bino mibali oyo botikaka basi na bino básala makambo ya ndenge wana, nazali na elikya mpenza te ete bozali mibali. Ya solo. Ya solo. Sikawa, longonya ezali te mpo na likambo yango, mpamba te, to bolimbisi ezali te, mpo yango ezali ya solo. Mobali nyonso oyo akotika mwasi na ye ábima na balabala mpe ásala bongo, ndeko mobali, osengelaki kolata bilamba *na ye* nde. Ya solo. Yo, ee, oh la la!

158 Nalobi te ete mwasi na ngai akosala yango te. Kasi nasengeli kobongwana mpe kopengwa, longwa na oyo nazali sikawa, soki natikali kobika elongo na ye na ntango oyo azali kosala bongo. Mpe wana ezali mpenza ya solo.

Ntango mosusu bana na ngai ya basi bakosala yango ntango bakokóma mikoló. Nalobi te ete bakosala yango te. Nayebi te. Etali mawa ya Nzambe. Nalikii ete bakosala yango te. Soki basali yango, bakosila konyata mabondeli ya tata oyo azalaki moyengebene. Bakonyata bomoi ya moto oyo amekaki kobika bomoi malamumu, soki batikali kosala yango. Ezali ya solo. Kasi nalingi kobika malamumu, kolakisa malamumu, kozala malamumu, mpe nakoka kolakisa bango nzela ya malamumu. Soki basali yango, bakofungola na makasi nzela na bango mpo na kokende na lifelo, bakonyata mateya na ngai, mpe Klisto na ngai, mpe makebisi na ngai, ya solo, soki batikali mpenza kosala yango. Na ntembe te. Ezali ya solo.

159 Nsoni na yo. Soki osilá kokutana na Klisto miso na miso, mpe apamboli yo, mpe asepwi yo na motema mpo na koyamba yo, milimo mabe nyonso ya lifelo bakokoka lisusu kolatisa yo yango te. Ezali ya solo. Osili kobongwana, longwa na kufa kino na Bomoi, mpe okóma kolinga biloko ya likoló, kasi biloko ya mokili te. Amen. Malamu nátika likambo yango. Ezali makasi mingi. Malamu. Kasi ezali Solo.

160 Malamu, wana tozokoba mwa moke liboso, na nsima tokosukisa.

. . . solo baoyo bazali bana na Lewi, . . . bakozuaka moko na zomi ya mosala na nganga, mpe bazali na lilako kati na mibeko ete bakamata moko na zomi na biloko epai na bato, baoyo bandeko na bango, ata bautaki na libota na Abalayama:

Kasi moto oyo azalaki libota moko na bango te ndambo na zomi epai na Abalayama, mpe apambolaki ye oyo azalaki kati na elaka.

Ezali likambo na bantembe soko moke te ete oyo aleki moke apambwama na oyo aleki monene.

Awa ndambo na zomi epai na bato bakofutaka; nde awa, na ye oyo atatolami mpo na ye ete azali naino kobika. Mpe ngai. . .

Nakoki. . . koloba, Lewi mpe, . . . azuaki moko na zomi, azuaki ndambo na zomi, akabaki ndambo na zomi na nzela na Abalayama.

Zambi azalaki kati na loketo na nkoko na ye, wana ezuanaki Melekisedeke na ye.

161 Ezaleli na yo—na yo liboso na Klisto ekotika elembo monene likoló na oyo bana na yo bakozala. Bomoi na yo, oyo ozali kobika liboso na libota na yo, ekotika elembo likoló na oyo bana na yo bakozala. Mpamba te, Biblia elobi ete: “Akoya kotala lisumu na nko ya baboti epai na bana kino na mabota ya misato mpe ya minei.”

162 Sikawa, kaka mwa ntango moke, liboso ya kosukisa.

Mpe yango wana soki bobongi be (bobongi be yango wana lisusu) eyaki na nzela na bonganga na Balewi, (mpo na yango bato bapesamaki mibeko,) ngangwa mosusu atelemaki mpo na nini. . . ye oyo na molongo na Melekisedeke, oyo na molongo na Alona te?

163 Mobeko, moto na mibeko, bomoni: “Oh, osengeli kosala oyo. Soki osali oyo te, ozali Moklisto te. Soki otosi sabata te! Soki te. . . Soki olei mosuni! Soki osali makambo oyo!” Makanisi nyonso ya bato na mibeko wana. “Mpe osengeli kokende na losambo. Soki te, okosala etumbu mpo na lisumu yango. Osengeli kosala neuvaine.” Eloko yango ezali bolema. Obikisami na ngolu na Nzambe, na makoki ya Nzambe ya koyeba makambo liboso,

na kobongisama liboso. Nzambe abiangaki Abraham na nzela na kobongisama liboso, na makoki ya boyebi-makambo-liboso. Abengaki ye. Ye ayinaki Esau, mpe alingaki Yakobo, liboso ete moko na bango ábotama. Ya solo. Ézali—ezali makoki ya Nzambe ya boyebi-makambo-liboso, nde ayebaka makambo yango.

164 Bongo bokoloba: “Ntina nini koteya Nsango-malamu?”

165 Sikawa nakoloba na bino, boye. Paulo ayanolaki na yango, to Yesu, kutu. Yesu Ye oyo. Alobaki: “Bokonzi ya Likoló ezali lokola moto oyo akendeki na esika oyo, na—na eziba to na láki, mpe abwakaki monyama na kati. Abendaki yango. Na kati na yango, azuaki bankóbá. Azuaki bankóbá ya láki. Azuaki banyoka. Azuaki miseleketete. Azuaki magborodo. Azuaki alúlu. Azuaki bambisi oyo eliaka bosoto. Azuaki—azuaki mbisi.” Sikawa, moto yango azali bobele kolóbo.

166 Ezali lokola Nsango-malamu. Yango oyo sikawa, nazali koteya Nsango-malamu. Nazali kaka kobwaka monyama. Nakobenda yango, nalobi: “Baoyo nyonso balingi, ézala nani, áyá.” Mpe tala bamosusu bapusani, na etumbelo. Bango nyonso basangani zinga-zinga na etumbelo. Babondeli. Baleli. Nayebi te nani azali nini. Etali ngai te. Natindamaki mpo na kosambisa te.

167 Kasi, bamosusu bazali na kati, oyo bazali magborodo. Bamosusu bazali miseleketete. Bamosusu bazali banyoka. Ezali, bamosusu bazali bankóbá. Mpe ezali na bamosusu oyo bazali mbisi. Ezali likambo na ngai te kosambisa bango. Nalobaka: “Tata, baoyo nabimisi bango oyo.”

168 Kasi, ligborodo ezalaki ligborodo, mpo na kobanda.

169 Alúlu, mobange na alúlu akofanda wana mpe akotambwisa miso, mwa moke, akobalola miso minene wana, akotambwisa miso epai na epai, akoloba: “Boyebi nini? Nakoki lisusu koyikela Yango mpiko te.” Plop, plop, plop, plop, abimi mpe akei.

170 Mobange mama nyoka akotombola motó, mpe alobi: “Ee, boyebi nini? Soki bakoteya ndenge wana, kotelemela bakupe ya mikuse mpe biloko wana, wana ezolobela ngai. Boye, nakolongwa na etonga ya batúntuki wana. Yango nde nyonso oyo bango bazali.” Ozalaki nyoka mpo na kobanda. Ezali mpenza ya solo. Iyo.

171 Mpe tala misie ligbóroro-kpódo, na likaya ya monene mpenza na monoko, lokola ngombe ya Texas oyo balongolá maseke, akotelema wana mpe akotambwisa miso, alobi: “Ee, komela makaya ekweisaka na yango ngai te. Nakobima na ngai kaka na likambo oyo, noki-noki.” Ee, yo mobange na ligbólolo oyo, ozalaki bongo, mpo na kobanda. Ezali mpenza ya solo. Ezali mpenza ya solo.

172 Lolenge na yo etalisaka polele oyo yo ozali. Bomoï na yo elakisaka, etalisaka, oyo yo ozali, banda na ebandeli. Ezali na

yango mpasi te mpo na ngai komona yango. Ezali na yango mpasi te mpo na yo komona yango.

173 Soki nakendeki epai ya Roy Slaughter, mosali bilanga oyo afandi awa, mpe namonaki bangulu libanda likoló ya fúlu ya bosoto, koliáká bosoto, nakokanisa mabe te na ntina na yango. Azali ngúlu. Kasi soki namonaki mwana mpate likoló ya fúlu ya bosoto, nalingaki komituna. Uh-huh. Bomoni? Komitungisa te okomona ye kuna te. Akoki koyikela yango mpiko te. Ya solo.

174 Mpe moto oyo abotami na Molimo na Nzambe ayinaka makambo ya mokili. Ya solo: “Mpamba te soki olingi mokili to makambo ya mokili, bolingo na Nzambe ezali kati na yo te.”

175 Soki nabimaka na basi mikolo nyonso, mpe nazongi, nayebisi mwasi na ngai ete nalingi ye, akoyeba ete nazali mokosi. Misala na ngai ekoloba makasi koleka maloba na ngai. Ya solo mpenza. Nazali kotalisa ye polele ete nalingaka ye te, mpo nazali sembo epai na ye te.

176 Soki ayebisaki ngai ete alingaka ngai, mpe mbala nyonso oyo nazalaka te, ete abimaka na moto mosusu, ekotalisa polele ete alingaka na ye ngai te. Ya solo. Misala na ye etalisi yango polele. Etali ngai te ndenge nionso oyo akomeka koyebisa ngai ete: “Bill, nalingi yo, mpe mosusu azali te na mokili mobimba, bobele yo,” nakoyeba ete azali mokosi.

177 Mpe ntango omekaka koloba: “Nkolo, nalingi Yo,” mpe ozali kosala makambo ya mokili, Nzambe ayebi ete ozali mokosi, mpo na kobanda. Boye mpo na nini? Ntina nini kondima kobikela ndambo ya likambo, mpe eloko moko mosusu ya ndenge wana, na ntango oyo mapata minene ya Lola etondi na eloko ya solosolo? Mpo na nini olingi kozala Moklisto moko ya maloba, ya bolozu, ya ndambo, oyo abélí malamú te? Na ntango oyo okoki kozala mwana na Nzambe ya solosolo, oyo abotami mbala ya mibale, ná bangonga ya esengo ya Lola kobetáká na motema, kosepeláká, kosanzoláká Nzambe, mpe kobikáká bomoi ya elonga na nzela na Yesu Klisto.

178 Ezali likambo ya koluka kosala yango yo moko te, mpo okolonga te, mpo na kobanda. Kasi zua Ye, Ezali Liloba na Ye, mpe pema likoló na oyo Ye alobaki ete ezali Solo. Mpe ndimela Ye, linga Ye, mpe Akotambwisa makambo nyonso elongo mpo na bolamu na yo. Nde yango. Yango nde likanisi.

179 Nkolo Apambola bino. Nalingaka kopamela bino te, kasi, ndeko, ezalaka malamú kozua mwa mpámelá. Bozali bilenge na ngai. Bomoni? Mpe tata nyonso oyo alingaka bana na ye akosembola bango solo, soki te, azali papa oyo asengeli te. Ezali solo? Ya solo. Mpe papa oyo azalaka kaka na mobeko moko, ezali mobeko ya ndako. Mpe Nzambe azali bobele na mobeko moko, ezali Liloba na Ye.

180 Soki tondimi Liloba na Ye, boye tokobika kokokana na Liloba na Ye. Ezali lotómo na biso, soki totikálá kokutana na

Nzambe. Ezali te mpo olobaka: “Ee, nasambelaka, mpe nasengeli nasala *oyo*.” Ozali moto na bolozu. Kosalaka bongo te. Ntina nini olingi kozala eyánganga moko ya bolozu, bosoto, ná nsála epanzáná, na ntango oyo okoki kozala ebenga? Ya solo mpenza. Kaka lolenge na yo nde esengeli kobongwana. Mpe bongola lolenge na yo, kóma mwana mobali to mwana mwasi ya Nzambe, zalá na kimia elongo ná Nzambe.

¹⁸¹ Yesu! “Yango wana Yesu mpe, mpo Ye akoka kobulisa bato na Makila na Ye mpenza, anyokwamaki libanda na bikuke,” Baebele 13:12 mpe 13. Baloma 5:1: “Yango wana esili biso kolongisama na kondima,” na kopesana mbote ya maboko te, na libatisi na mai te, na kotiela maboko te, na kogánga te, na koloba minoko na sika te, na eyokeli moko te. “Kasi esili biso kolongisama na kondima, tozali na kimia elongo ná Nzambe kati na Nkolo na biso Yesu Klisto.” Tolongwe na kufa kino na Bomoi, mpe tokómi bikelamo ya sika, mpo tondimeli Mwana na likinda ya Nzambe, mpe toyambi Ye lokola Mobikisi na biso mpenza. Mpe Makila na Ye ezali kosala, na mpokwa oyo, lokola mbondi mpo na lisumu na biso, mpo na kotelema na esika na biso.

¹⁸² Na Kondimana na Kala, esika ya kosala bondeko ezalaki bobele moko, ezalaki na nse ya makila nde. Mondimi nyonso asengelaki koya na nsé ya makila. Ntango ngombe ya motane ebomamaki, ebongisamaki mpo na mbeka ya lisumu. Asengelaki kozala motane. Na mokapo ya 19 ya Esode, soki bamosusu kati na bino bakolinga kotanga yango. Asengelaki koliama, matindi, nyonso, kotumbama mobimba. Mpe yango nde bazalaki kosalela mai ya kokabola. Ezalaki kotiyama libanda na bikuke. Esengelaki kosimbama na loboko ya peto. Makila ya ngombe yango ezalaki kokende liboso. . . na eyanganelo, mpe komwangisama mbala nsambo likoló na ekuke. Mpe sikawa, moto nyonso ya mbindo oyo azalaki koya wana, asengelaki liboso koyeba mpe komona makila wana, mpe kososola ete bondeko ezali bobele na nse ya makila wana. Yango nde esika bobele moko oyo mosambeli akokaki mpenza kobondela na ndenge esengami, ezalaki na nse ya makila.

¹⁸³ Bongo, eloko ya liboso oyo asengelaki kosala, liboso ete ákoka koya na nse ya makila, basengelaki komwangisa mai ya kokabola oyo likoló na ye, mpe moto na mbindo yango azalaki kokóma peto.

¹⁸⁴ Mpe bazalaki kozua mai ya kokabola mpe komwangisa yango likoló na moí-mobembo, mpe ezalaki kokabola ye na masumu na ye. Na nsima, azalaki kotambola na nse ya mikolóto nsambo oyo, ya makila, mpo na kozala na bondeko elongo na bandimi oyo batikali Liboso na Nzambe.

¹⁸⁵ Nzela ya kosala yango ezali kaka moko. Ezali na kopesana mbote ya maboko te, na kokota na lingomba te, na mabátisi te, na biyokeli te; kasi pusana kino na mai ya kokabola, tia maboko na

yo, na kondima, likoló na motó ya Yesu, mpe loba: “Ngai nazali mosumuki, kasi Yo okufaki na esika na ngai. Mpe Eloko moko kati na ngai eyebisi ngai ete Okolimbisa ngai na masumu na ngai, mpe nayambi Yo lokola Mobikisi na ngai moko sikawa.” Tambola na nsé ya Makila, kuna, zala na bondeko elongo ná bana na Nzambe. Yango nde. Lia lipa, mela vinyo, mpe zala na bondeko elongo ná lingomba.

¹⁸⁶ Oh, Azali malamú mingi, boye te? Azali malamú, boye te? Sikawa, likambo oyo ekoki kokamwisa yo, moninga. Kasi mpo na—mpo na nini natelemi awa mpe nazali koloba makambo oyo? Nakolinga nde koloba yango mpo náluka kokesana na moto mosusu? Soki nasali bongo, nazali na bosenga ya kobongola motema. Nazali koloba Yango mpo Nzambe nde alobaki Yango, mpo Ezali Liloba na Nzambe. Mpe bóyoka. Ntango moko ezali koya, mpe ezali sikawa, oyo bato bazali kokende longwa na esti kino na westi, kolukáká Liloba na Nzambe, kasi bazali komona Yango te.

¹⁸⁷ Soki okei na liyangani moko, eloko ya liboso okosala, okoti kuna mpe bazali na minoko na sika mingi mpe ndimbola, mpe moto moko ateleme mpe azali kozongela Makomi; wana ezali mosuni. Ya solo mpenza. Nzambe alobaki na biso ete “tozongela maloba ya mpamba te,” ebongo Ye? Soki Asilaki kokoma Yango ntango moko, bondima Yango. Azali na ntina ya koloba Yango lisusu te. Minoko na sika mpe ndimbola ezali mabe te, kasi esengelaki kozala nsango oyo etindami mbala moko na lingomba mpe na moto moko, ezali te bobele ya mosuni mpe makambo ya ndenge wana. Nsima na yango bomemami na makambo mosusu nyonso oyo.

¹⁸⁸ Awa mokolo moko, mibali mibale bakotaki na . . . mobali moko ná mwasi na ye, mpe mobali mosusu ná mwasi na ye, bilenge babalani mpenza, bakotaki na esika moko, mpo na kokende na Afrika lokola bamisionére. Moto moko atelemaki mpe apesaki lisakoli, mpe alobaki minoko na sika mpe ndimbola, ete: “Moko na moko azalaki na mwasi ya moninga.” Ete: “Esengelaki kozala bongo te. Babalanaki na moto oyo esengelaki te.” Mpe bato yango, bango mibale, bakabwanaki mpe babalanaki lisusu. Mobali moko azuaki mwasi ya moninga, oyo mosusu, na denomination Pentecotiste moko ya monene, mpe bakendeki na Afrika lokola bamisionére.

¹⁸⁹ Ndeko, ntango okati ndai, okangami na ndai yango kino ete kufa ékangola yo. Ezali mpenza ya solo. Ya solo mpenza. Ntango okati ndai, ekangi yo.

¹⁹⁰ Nyonso wana ezali boléma! Mpe ekómi na esika moko, kino ntango okei na bandakonzambe, to ezali malili mpenza, na momesano, to ekaoká, na lolenge ete thermometre ya molimo ekiti na ntúku mitano na nse ya zero. Bato bafandi lokola litútú likoló ya cornichon, batondi na ngái, bazali kokipé te

mpe bakangi bilongi. Mpe soki oyoki moto moko, kuna na nsuka, na litumu, ntango mosusu akosolaka mwa “amen,” moko mbala na mbala, lokola ete ezali kosala ye mpasi, bango nyonso bakotombola nkingo lokola mabata, mpo na kotambwisa miso, komona likambo oyo esalemi. Boyebi ete ezali solo. Nazoloba yango mpo na maseki te. Oyo ezali esika ya kosala maseki te. Ezali Solo. Ya solo. Nazali koloba yango mpo ezali Solo ya Nsango-malamu.

¹⁹¹ Na ngámbo mosusu, bolemá etondi, komemama na biyokelo ya nzoto etondi, mpe sukasuka Liloba na Nzambe ya solo ekomi na esika oyo koyoka Yango ekómi mpasi: kati-kati ya nzela oyo ya kala, Nsango-malamu, Mwindi na nzela na ngai ya moke, aleluya, Makila ya Mwana-mpate, bolingo na Nzambe, oyo ekabolaka biso na makambo ya mokili.

¹⁹² “Olobá minoko na sika, ndeko? Ozali na Yango te. Ogangaki kino ete oyokaki mwa malili na mokongo? Omonaki mabungutulu ya móto?” Oh, boléma! Likambo ya ndenge wana ezalaka te.

¹⁹³ Osila nde kondimela Nkolo Yesu Klisto mpe koyamba Ye lokola Mobikisi na yo mpenza? Mpe Molimo na Nzambe etatolaka na milimo na bino ete bozali mbana mibali mpe bana basi ya Nzambe. Mpe bomoi na yo ebataka mbuma ya bolingo, esengo, kimia, motema molai, boboto, bopolo, bolamu. Na bongo, ozali Moklisto. Soki bongo te, oyo osalaka ezali na ntina te.

Paulo alobaki: “Nakoki kopesa nzoto na ngai mpo na kotumbama lokola mbeka. Nayebaki mabombami nyonso ya Nzambe. Nakoki kolongola bangomba na kondima na ngai. Nakoki koloba minoko na sika lokola bato mpe Banje. Nazali mpamba.” Bolobi nini mpo na yango? Bakolinti ya Liboso 13; bótala soki Ezali bongo to te.

¹⁹⁴ Sikawa, bótala soki—soki Bakolinti, Bakolinti ya Mibale 13, nabanzi. To, ee, to ezali Bakolinti ya Liboso, to Bakolinti ya Mibale. Bakolinti ya Liboso, yango, Bakolinti ya Liboso 13, ezali yango. “Ata soko nalobi minoko ya bato mpe ya Banje,” nyonso mibale oyo ekoki kolimbolama, ná oyo ekoki kolimbolama te: “Nazali mpamba.” Boye ntina nini kobebisa ntango na makambo yango, kasi?

¹⁹⁵ “Ata soko nasosoli mabombami nyonso ya Nzambe.” Mpo na nini bokendeke na makindo mpo na koluka koyekola makambo nyonso wana? Malamu óbongisa na Nzambe, liboso. Ya solo mpenza. “Ata soko nalobi: ‘Oh, aleluya epambwami!’”

¹⁹⁶ Bokomi na esika oyo bokoki ata kozala na eyanganelo te, bobele soki bosali mayangani ya kobondela mpo na babeli to bikamwiseli moko boye. “Ekeke ya bolembu mpe ya ekobo nde elukaka makambo ya ndenge wana.” Bolingi yango mpo na nini?

¹⁹⁷ Paulo alobaki ete akokaki kosala makambo ya ndenge na ndenge, ata kolongola bangomba, kasi azali kaka mpamba.

“Epai minoko na sika ezali, ekosuka. Epai boyebi ezali, ekolimwa. Epai bisakweli ezali, ekokwea. Kasi ntango oyo ebongi be ekoya, ekoumela seko,” mpe bolingo ezali bobongi be. “Nzambe alingaki mokili mingi, na lolenge ete Apesaki Mwana-na-likinda na Ye, mpo,” moto nyonso oyo akoyoka nzoto malili, moto nyonso oyo akolénga, moto nyonso oyo akoloba, moto nyons- . . . ? “moto nyonso oyo akondimela Ye ákufa te, kasi ázwa Bomo na Seko.” Bondima yango, bana.

¹⁹⁸ Bazali koluka kokómisa yango kpókóso, biloko *oyo* mpe biloko *oyo kuna*. Nzokande, esuki na eloko bobele moko: kondima na yo moko epai na Nzambe. Yango nde. Yango nde elakisaka yango. “Mpamba te na kondima,” na eyokeli te. “Na kondima,” na kotuntuka te. “Na kondima,” na komiyoka nzoto te. “Kasi na kondima nde obikisami; mpe yango na . . .” Mpo olukaki Nkolo? Mpo ozalaki moto malamú? Mpo ete, “Nzambe, na ngolu, ayebaki yo liboso mpe abongisaki yo mpo na Bomo na Seko.”

¹⁹⁹ Yesu alobaki: “Moto moko te akoki koya epai na Ngai, bobele soko Tata na Ngai abéndi ye. Mpe baoyo nyonso bakoya epai na Ngai, Nakopesa bango Bomo na Seko. Moto moko te akoki kobotola bango na loboko na Ngai. Bazali ya Ngai. Babikisami mpo na libela. Nazui bango. Moto moko te akoki kobotola bango na loboko ya Tata na Ngai, mpe Ye nde apesi Ngai bango. Bazali makabo ya bolingo mpo na Ngai.”

²⁰⁰ “Mpe baoyo nyonso Ye ayebaki liboso, Abengaki bango.” Abengaka moto te, bobele soko Ayebaki ye liboso. “Baoyo nyonso Abengaki, Alongisaki bango; baoyo nyonso Alongisaki, Akembisaki bango.” Na bongo, bomoni, tozali mpenza na bopemi oyo ebongi be.

²⁰¹ Sikawa, nayebi ete bato na mibeko mingi bazali awa, bato ntuku libwa na libwa likoló na mokama kati bino. Kasi, bótala, soki bokoki kozua Yango mpe kososola ete nazali koluka koloba na bino eloko moko boye te.

²⁰² Bongo okoloba: “Ee, Ndeko Branham, nakanisaka ntango nyonso ete nasengeli kosala *oyo* mpe nasengelaki kosala *oyo kuna*.” Bokeseni ezali mpe—mpenza monene kati na yango, ndeko, oyo osengeli kosala mpe oyo olingi kosala. Obikisami, te mpo ozalaki na likambo moko ya kosala kati na yango. Obikisami mpo Nzambe abikisaki yo liboso na kozalisama ya mokili.

²⁰³ Bóyoka, boyoka awa, Biblia elobi, na Emoniseli, nakomema bino banda na ebandeli kino na nsuka sikawa, Biblia elobi, na Emoniseli, ete, ntango nyama ayaki: “Apengwisaki bato nyonso na mokili,” nyama nde asalaki yango, “apengwisaki bato nyonso na mokili, baoyo nkombo na bango ekomamaki te na Buku na Bomo ya Mwana-mpate,” Banda mokolo mayangani ya kolamuka ebandaki, wana eyokani malamú? Ee, uta ntango

motei ateyaki liteya ya nguya wana? Uta ntango mobali wana abikaki na bokono? “banda na kozalisama ya mokili.”

²⁰⁴ Yesu abomamaki wapi, na Kalvari? Te, misie. Yesu abomamaki liboso na kozalisama ya mokili. “Tala Mwana-mpate ya Nzambe, oyo abomamaki liboso na kozalisama na mokili.” Nzambe, na ebandeli, ntango Amonaki lisumu, ntango Amonaki oyo esalemaki, Alobaki Liloba. Mpe Yesu abomamaki liboso na kozalisama ya mokili. Mpe moto nyonso oyo abikisamaki, abikisamaki, kokokana na Biblia, ntango Mwana-mpate abomamaki na likanisi ya Nzambe, liboso na kozalisama ya mokili. Bozalaki na kati ya lobiko na ntango yango. Boye, okosala nini mpo na Yango?

²⁰⁵ Ezali Nzambe. Nkombo na Nkolo epambolama! “Nzambe nde asalaka; etali ye oyo alingi to ye oyo apoti mbangu te, kasi Nzambe oyo ayokelaka bato mawa.”

Soki Yesu abomamaki liboso na kozalisama ya mokili, ezuaki mibu nkoto minei liboso ete yango ékoka mpenza kosalema. Kasi ntango Nzambe alobaki yango awa, Liloba moko na moko ya Nzambe esalaka mosala na yango. Ebongwanaka te. Ekabwanaka te. Ekokoki kokweya te. Mpe ntango Nzambe abomaki Mwana liboso na kozalisama ya mokili, Abomamaki mpenza na ntango yango, ndenge Abomamaki na Kalvári. Ezali eloko oyo esíli kosalema, ntango Nzambe alobi yango. Mpe bokanisa, ntango Mwana-mpate abomamaki, lobiko na bino ezalaki na kati ya mbeka yango, mpamba te Biblia elobi ete nkombo na yo “ekomamaki na Buku na Bomoi ya Mwana-mpate liboso na kozalisama ya mokili.”

Bolobi nini na oyo wana? Na bongo, tokosala nini? Nzambe nde ayokelaka bato mawa. Nzambe nde abengaki bino. Nzambe nde aponaki bino kati na Klisto liboso na kozalisama ya mokili. Yesu alobaki: “Bino botikálá te—bino botikálá kopona Ngai te. Ngai nde naponaki bino. Mpe Nayebaki bino, liboso na kozalisama ya mokili.” Yango mpenza.

²⁰⁶ Boye, bomoni, elongolaka yo nsomo yango. “Oh, nazali komituna soki nakoki kokoba kosimba makasi? Nakokoka, Nzambe ápambolama, soki bobele nakoki kokóba kosimba makasi.” Etali te soki ngai nasimbi makasi, to te. Ezali nde soki Ye asimbacki makasi, to te. Ezali oyo—oyo Ye asalaki, oyo ngai nasalaki te. Ezali oyo Ye asalaki.

Lokola na eleko ya mobeko ya lisiko. Oyo ezali mwa likambo nalingi koloba, liboso ya kosukisa.

²⁰⁷ Bongo soki mama mpunda ebóti mbalata-mpunda? Mpe mwana ya mbalata-mpunda yango, matoi na yango nyonso mibale ekwéyá. Miso na ye eténgámá, mabólóngó etútáná, makolo eténgámá. Mokila na ye etéléma líkoló. Nyama ya nsomo mpenza, na miso boye! Ee, moto nyonso. . . Soki mwa mbalata-mpunda yango ekokaki kokanisa, koloba: “Sikawa, zela naino.

Ntango bakobima na ndako na ntongo oyo, nalobi na bino, na ntembe te, bakobeta ngai na motó. Mpamba te, baleisaka ngai te. Bótala ndenge nazali mabe. Nazali ata na libakú malamumu te.”

208 Malamumu, ya solo. Ozali na libakumu malamumu te. “Ee, nabotámá na mokili oyo, kasi bótala ndenge nazali na ngai mwa eloko moko ya mabe. Na bongo, na—na—na—nakotikala kozala na libakumu malamumu te. Nakokoka na ngai te. Nakoki te.” Bomoni?

209 Kasi bongo soki mama na ye ayebi mobeko malamumu? Akoloba: “Mwana, ya solo. Ozali mabe, mpe obongi ata te kolia bilei oyo mabelé eboti. Ezali ya solo. Obongi te. Kasi, mwana, ata bongo, ozali mwana na ngai ya liboso. Mpe, oyebi, obotámá ná makoki ya bokulútu. Mpe nganganzambe akomona yo te. Kasi, mpo na nkombo na yo, mwana mpate moko esengeli kozala, oyo esálá mabe te, ezangá mbebá, esengeli kokufa na esika na yo, mpo ókoka kozala na bomoi.”

210 Ee, mwa mbalata-mpunda yango akokaki kotuta manyatá na ye mpe kosepela mpenza. Ekosala bokeseni moko te oyo ye azali, mpamba te zúzi, nganganzambe akomona ye te. Nganganzambe atalaka nde mwana-mpate. Mbalata-mpunda te; mwana-mpate nde!

211 Mpe Nzambe atalaka nde Klisto, yo te. Klisto nde. Boye, soki Ye azali na mbéba moko te, ndenge nini mbéba ekoki kozala? Ndenge nini Akoki komona mbéba, ntango osili kokufa mpe bomoi na yo ebombami kati na Klisto na nzela na Nzambe, otiami elembo na Molimo Mosanto? “Baoyo babotami na Nzambe basalaka lisumu te, mpo akoki kosala lisumu te.” Ndenge nini akoki kosala lisumu, na ntango oyo mbeka oyo ebongi be ezui esika na ye? Nzambe atalaka ngai te, Atalaka nde Klisto, mpo tozali kati na Klisto.

212 Sikoyo, soki nalingi Klisto, nakobika elongo ná Ye. Alingaki kokotisa ngai te soki Ayebi te. Soki Nzambe abikisi ngai lelo, koyeba ete Akobungisa ngai nsima na mpóso motoba, Akotelemela ntina na Ye moko. Ya solo. Na bongo Ayebi ata mikolo mikoya te, soki Abikisi ngai, koyeba bongo. Akobikisa ngai mpo na nini, koyeba ete Akobungisa ngai? Nzambe asalaka makambo te, bongo ázongela yango, nsima na mpóso mibale, mpo na kokokisa elaká na Ye. Ntango Abikisaki yo, ezali mpo na ntango mpe Seko.

213 Sikawa, okoki komemama, mpe koloba: “Oh, iyo, Nzambe apambolama! Aleluya! Nalobaki minoko na sika. Nagángáki. Nazali na yango. Aleluya!” Elakisi te ete ozali na Yango. Kasi, ndeko, soki Eloko moko ekoti *awa*, mpe otii lóngo na Klisto, na nsima mbuma ya Molimo ekolanda yo. Totatolamaka, molimo na biso elongo ná Molimo na Ye, ete tozali bana mibali mpe bana basi ya Nzambe. Nasengi na bino ete bózala na Yango, baninga.

214 Nakokanga bino awa butu mobimba, mpo na kolobela yango. Nalingaka Yango. Nalingi bino. Nazongaka na mwa tabernacle

oyo, mbala na mbala, soki Nzambe akobatela bomoi na ngai. Nalingi komona bino kobota misisa mpe kotelema ngwi kati na Kondima Mosanto wana. Nalingi te komona bino komemama na mwa mopepe nyonso ya malakisi, oyo eyaka, mpe koningisa bino, mpe komemama, kozala na mwa makila na maboko, to mwa malili na elongi, to eloko moko to mosusu, mpe komona mwa ba—ba—bapole liboso na bango, mpe mwa e—eloko moko mpo na bolamu na bango moko, ndenge Biblia elobi: “Lolendo na motema na ye, nzokande amoni eloko te.” Ya solo. Nalingi ete bókemba na Liloba. Soki ezali YANGO ELOBI NKOLO, bókangama na Yango, bótosa Yango. Yango nde Urimi Tumimi ya lelo. Nzambe alingi bobikaka na Yango. Soki ezali kati na Liloba te, boye bóbosana yango. Bóbíka mpo na Nzambe, bóbíka mpo na Klisto.

²¹⁵ Mpe soki motema na yo ebandi kobunga nzela, oyebi ete likambo moko esalemi, zonga na etumbelo mpe loba: “Klisto, zongisela ngai . . . esengo ya lobiko na ngai. Pesa ngai bolingo oyo nazaláká na yango. Ezali kosila, Nkolo. Nasalaki likambo moko. Kómisa ngai lisusu mosantu, telemisa ngai lisusu. E Nkolo, nakoki kosala eloko moko te. Nazali kokoka kotika *oyo* te, mpe kotika *oyo kuna te*. Nataleli Yo mpo na kolongola yango kati na ngai, Nkolo, mpe nalingi Yo.”

²¹⁶ Mpe longwa na etumbelo yango, moto ya sika kati na Klisto Yesu. Bongo okotalela lingomba na yo te, okotalela sánzó na bino te, okotalela mokengeli na bino te. Okómi kotalela Makila oyo esopanaki ya Nkolo Yesu. “Na nzela na ngolu nde bino bobikisami.”

Tóbondela.

²¹⁷ Nkolo, ezali mpenza malakisi ya makasi! Ntango ekoki mpo losambo oyo ébanda kolia misuni, mpe étika miliki ya Liloba. Toumeli ntango molai koleka na miliki sikawa, mpo na komelisa bebé yango biberó. Kasi tosengeli tolia misuni ya makasi, mpo mokolo yango ezali kobeleva. Ntango ya mpasi mingi ekómi pene, mpe mokakatano mingi ezali na nzela. Mpe toyebi ete ntango ya malamú koleka ekoya te. Toyebi ete tokómi na nsuka. Ntango ekokóba kobeba se kobeba kino ntango Yesu akoya, kokokana na Makomi.

²¹⁸ Tokoki kolaka bango eloko moko te, na bomoi oyo. Kasi na bomoi oyo ekoya, tokoki kolaka bango Bomoi na Seko na nzela na Liloba na Yo, soki bakondimela Mwana na Nzambe mpe bakoyamba Ye lokola Mbondi na bango, lokola Ye oyo azuaki esika na bango, lokola Ye Oyo amemaki masumu na bango. Kokisa yango sasaipi.

²¹⁹ Tika ete bazangi kondima bákóma bandimi. Tika ete baoyo batatolaka lingomba, oyo bazali awa na mpokwa oyo, baoyo bazalaki kotatola ete basambelaka mpe baoyo bazali bobele kobika kati na lingomba, tika ete bábíkela likambo elongo na

Nzambe; ete bolingo mpenza ékota na mitema na bango, na lolenge ete bálela mpo na masumu na bango, bákufa kati na bango moko, mpe bábotama mbala ya sika na Molimo Mosanto, mpe bákóma na bopolo mpe boboto, bolingo, mpe bátonda na esengo mpe na mapamboli. Kobikáká bomoi moko, oyo bakokóma mungwa oyo esengeli na lolenge ete bazalani na bango bakoyoka mposa ya kokóma lokola bango. Kokisa yango, Nkolo, mpo tosengi yango na Nkombo na Ye.

Mpe wana togumbi mitó.

²²⁰ Nazali komituna, na mpokwa oyo, soki moto moko akoki kozala awa, loba: “Ndeko Branham, soki batii ngai na kilo ya Nzambe sikawa, Nalingaki ata moke te, ata moke te, ata moke te kokokisa makoki oyo ozali kolobela na mpokwa oyo. Nalingi ete okanisa ngai na libondeli, mpo ná bongola ba-nzela na ngai, mpe Nzambe ákota mpe álongola bolema oyo kati na ngai mpe ákómisa ngai Moklisto ya solo”? Okolinga kotombola loboko mpo na libondeli, wana yo, soki okolinga? Nzambe ápambola yo. Nzambe ápambola yo. Nzambe ápambola yo, na nsima kuna. Nzambe ápambola yo. Nzambe ápambola yo, misie. Nzambe ápambola yo, ndeko mobali. Nzambe ápambola yo, ndeko mwasi.

Santu, Santu, Santu, Nkolo Nzambe na bibebe.
Likoló mpe nse etondi na Yo,
Likoló mpe nse ezali kokumisa Yo,
E Nkolo oyo-Aleki-Likoló.

Santu . . .

²²¹ Wana ozali kokanisa sikawa, kobondela, wana ozali komona ete bondimisami ete ozalaki na libunga, mpe olingi kozala alimá, okoki kotombola loboko, koloba: “Nzambe, kómisa ngai oyo nasengeli kozala”? Nzambe ápambola yo, mama moke. “Nzambe, kómisa ngai oyo nasengeli kozala.” Nzambe ápambola yo, ndeko mobali, ndeko mwasi, yo, yo, yo *awa*.

²²² Mokolo ezali kokufa. Nayebi ete ezali mpasi, baninga, kasi eleki malamú koyeba Solo sikawa. Sikawa bobondela na kimia.

Santu, Santu, Santu, Nkolo Nzambe . . .

Bobebe Ye nde azali mosantu.

. . . etondi na Yo,
Likoló mpe nsé ezali kokumisa Yo,
E Nkolo oyo-Aleki-Likoló.

²²³ Tata na Likoló, wana moi ezali kolala na mpokwa, ndeke ya ntólo motáne bazali kosangana na ba-nzete elongo na balingami na bango. Bandeke nyonso bazali kokende na bazumbú na bango. Bibengá ezali kopumbwa likoló na bansinga, likoló, mpo banyoka bátungisa bango te, na butú. Bafandi kuna mpe bazozala selesele bamoko na bamosusu kino ntango bakolala. Sukasuka moi ekolala.

224 Mokolo moko tokokóma na ngonga yango. Kolala na moi ekosalema. Nayebi te na ntango nini, Nkolo. Kasi bato mosusu bazali awa na mpokwa oyo, oyo bandimisami ete bazalaki na libunga, mpe balingi kokóma na esika wana, ndenge Lincoln akómaki wana ntango alingaki kokufa, alobaki: “Bóbalola elongi na ngai epai moi ezali kolala.” Mpe asambelaki: “Tata na biso Ozali na Likoló.”

225 Ndenge Moody, kala, alobaki: “Oyo nde kufa? Oyo nde mokolo na ngai ya kolata motole.”

226 E Yawe na Seko, yamba bango sikawa, na kondima, wana bafandi kuna na bifandelo na bango. Obeti na mitema na bango, wana bafandi. Yango nde etumbelo na bango. Ntango ekoki mpo Óyamba bango, sikawa. Olobaki: “Ye oyo akoya epai na Ngai, Nakobwaka ye libanda soki moke te.”

227 Mpe mokolo moko, ntango moi ekobanda kolala, mwasi to mobali akozala pembeni na mbeto, minganga bakei. E Santu, Santu, na kimia ya kitoko mpe ya bopolo wana, liboso mpenza ete moi élala. Na ntango yango nde tokokoka kotelema mpe koloba:

Kolala ya moi mpe Monzoto ya Mpokwa
Mpe kobengama moko ya polele mpo na ngai!
Mpe tika ete likambo moko ézala te, na
esambiselo,
Ntango nakonana na mbu.

228 E Nzambe, kokisela bango yango na ngonga oyo, wana bazali kozela, kozela ete mapamboli ya Nzambe ékita likoló na bango. Longola nkanda nyonso, nyonso oyo ya mokili, mosika na bango, mpe kela kati na bango motema ya sika. Olobaki: “Nakolongola motema ya kala, mpe kotia na kati motema ya mosuni. Mpe Nakotia Molimo na Ngai na kati ya motema yango, mpe bakotambola kati na malako na Ngai mpe bakotosa mibeko na Ngai.” Mpamba te, ezali mobeko ya bolingo, kasi ya lotomo te. Ezali nde ya bolingo. Mpe bolingo nde epusaka biso ete tósala yango. Ezali mosala ya bolingo, mpo na kopusa biso. Ezali lotómo na biso kolanda bolingo. Mpe nabondeli, e Nzambe, ete Ópesa yango na motema ya moto moko na moko oyo atombolaki loboko na mpokwa oyo.

229 Mpe baoyo batomboli loboko te, tika ete sasaipi, na ngolu, batombola maboko mpo na koyamba Yo, mpo bátondisama na Molimo na Yo na lolenge oyo ya bopolo, boboto, kimia, mpe komikitisa; mpe bátondisama na ngolu, bábima awa lokola bato oyo babongwani. Bandeke bakoyemba mpenza ndenge mosusu, moto nyoso akókóma ndenge mosusu, nsima na ngonga oyo, E Nkolo oyo-Aleki-Likoló.

Santu, Santu, Santu, Nkolo Nzambe ya nse.
Likoló mpe nse etondi na Yo,
Likoló mpe nse ezali kokumisa Yo,
E Nkolo oyo-Aleki-Likoló.

²³⁰ Bino sikawa, wana bogumbi mitó, bino baoyo botombolaki maboko mpo bókanisama na libondeli, bozali koyoka lokola ete Nzambe asololi na bino na lolenge moko sikawa, na komiyoka nzoto te, kasi eloko moko na kati na bino, bozali komiyoka lokola ete Nzambe apesi bino Bomoï na Seko? Ozali komiyoka lokola ete okobima na losambo, na mpokwa oyo, lokola moto mosusu? Okolinga kotombola lisusu maboko na mpokwa oyo? Nzambe ápambola yo, mwana mobali. Nzambe ápambola yo, ndeko mobali. Nzambe ápambola yo, ndeko mwasi. Nzambe ápambola yo. Ezali ya solo. “Na mpokwa oyo, nakobima na losambo oyo, moto ya sika.” Babebé babotami sika na Bokonzi na Nzambe.

²³¹ Likambo nini esalemi? Nayebi ete ezalaka motindo ete bato báya na etumbelo. Wana ezali etumbelo ya ba-Methodiste, motindo ya ba-Methodiste, nalingaki koloba. Etiamaki na lingomba Methodiste, na mikolo ya John Wesley. Etikálá kozala te, na eleko ya Biblia. “Baoyo nyonso bandimaki, bazalaki kobakisama na Lingomba.” Okoki kondima na esika nyonso ozali, na elanga, na balabala, ata wapi. Ata wapi, esalaka bokeseni moko te, bobele ete óyamba Klisto lokola Mobikisi na yo moko. Ezali mosala ya Molimo Mosanto oyo ekoti na motema na yo. Ntango bondimeli Ye, boyambi Ye, bolongwe na kufa mpo na koingela na Bomoï, mpe bokómi bikelamu ya sika kati na Klisto Yesu.

Koleka ngai te, E Mobikisi malamú,
Sikawa bótelema.

. . . kolela na ngai ya komikitisa;
Wana Ozali kobenga bamosusu,
Koleka ngai te.

²³² Sikawa nalingi ete elenge mobali na mama yango, nakanisi ete azali mwasi na ye, oyo otombolaki loboko, nalingi ete ótombola lisusu loboko, kuna; mwana mobali, oyo alati mokóto ya motane, ná mama wana, oyo bayambi Klisto lokola Mobikisi na bango moko. Elenge mobali oyo afandi awa na kiti ya bibosono, ayambi Klisto lokola Mobikisi na ye, ayókaki ete Nzambe abikisi ye. Mpe bamosusu na nsima kuna, oyo botombolaki maboko, bótonbola yango lisusu, mpo bato bákoka komona bino, kosolola na bino.

²³³ Bópesa bango mbote ya loboko, bato oyo bazali zingazinga, pembeni na bango. Bóloba: “Nzambe ápambola yo. Boyei bolamu na Bokonzi na Nzambe, ndeko na ngai ya mobali, ndeko na ngai mwasi.” Bondeko, yango nde tolingi. Nzambe ápambola. . . Bópesana mbote ya loboko ná elenge mobali oyo

awa, na kiti. Nkolo ázala na ye. Ezali ya solo. Totombeli bino boyei malamumu kati na bondeko ya Molimo Mosanto.

²³⁴ Soki bobatisámá naino te, mpe bozali na mposa ya kobatisama, bópusana awa mpe bóyebisa mokengeli mpo na yango. Esika ya libatizi awa ezali na mai na kati na yango, na mpokwa oyo, soki bokolinga kobatisama. Nyonso ebelemi. (Bobatisaki nde moto moko, ata bongo, liboso?) Kasi esika ya libatizi ebelemi, soki moto moko alingi kobatisama. Biblia elobi: “Bóbongola mitema, moko na moko na bino, mpe bóbatisama na Nkombo na Yesu Klisto mpo na bolimbisi ya masumu na bino, mpe bokozua likabo ya Molimo Mosanto. Mpo elaka yango ezali mpo na bino, bana na bino, mpe baoyo bazali mosika, motángó nyonso oyo Nkolo Nzambe na biso akobenga.”

²³⁵ Bolingi Ye? Bótómbola maboko. Oh, Azali malamumu mingi, boye te? Bozali kosepela na Buku ya Baebele oyo? Bolingi Yango? [Losambo balobi: “Amen.”—Mok.] Iyo. Malamumu mingi. Sikawa, Ezali kosembola. Oh, Ezali matata mpe ezali alimá, kasi tolingaka yango. Ndenge wana nde tolingi Yango ézala. Tokolinga te ete Ézala ndenge mosusu.

²³⁶ Sikawa, bondimi ete Paulo azali na bokonzi ya koteya Yango ndenge wana? Paulo alobaki: “Soko Mwanje moko ayei koteya nsango-malamumu mosusu, álakelama mabe.” Ezali ya solo? Boye biso tolingi Ye na motema na biso mobimba.

²³⁷ Sikawa nakosenga na mokengeli áya awa mwa moke, ndeko na biso ya motuya, Ndeko Neville, mpe akozala na likambo ya koyebisa bino. Mpe sikawa, soki Nkolo alingi, tokomona bino mokolo ya misato na mpokwa, mpe tokomibongisa mpo na kokende epai ya Ndeko Graham Snelling mpo na mpokwa moko ya liyangani. Na nsima, mpo na kokóba na mateya awa, mokapo ya 7 mpe ya 8, mokolo ya Misato oyo, na mpokwa. Ndeko Neville.



BAEBELE, MOKAPO YA NSAMBO 1 LIN57-0915E

(Hebrews, Chapter Seven 1)

MATEYA LIKOLO NA BUKU YA BAEBELE

Liteya ya Ndeko William Marrion Branham oyo, eteyamaki liboso na Anglais mokolo mwa Lomingo na mpokwa, 15, sanza ya Libwa, 1957, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org